

孔叢子

冊全



線  
121.89  
563  
25

舊



由國家圖書館數位化、典藏

孔

叢

子



四部備要

子部

上海中華書局據漢魏叢  
書本校刊

桐鄉

陸費逵總勘

杭縣

高時顯輯校  
吳汝霖

杭縣

丁輔之監造



3/3  
121.89  
563  
25  
注孔叢子序

孔叢子者乃孔子八世孫鮒字子魚仕陳勝爲博士以言不見用託目疾而退論集先君仲尼子思子上子高子順之言及己之事凡二十一篇爲六卷各之曰孔叢子蓋言有善而叢聚之也至漢孝武朝太常孔臧又以其所爲賦與書謂之連叢上下篇爲一卷附之于末然士大夫號藏書者所得本皆亥魚魯不堪其讀臣凡百購求以損益補竄近始完集然有語或淺固弗極於道疑後人增益乃悉誅去義例繁猥隨亦刪定因念彼鬼谷尉繚庚桑靈真浮夸汪洋之說尙且命氏于世矧是書所載皆先聖之言三代之術六藝之要在焉非諸子之流也又可泯而不稱耶故敢具所以然注而示諸學者云嘉祐二年戊戌歲二月日提點廣南西路諸州軍刑獄公事兼本路勸農事朝散郎守尙書屯田郎中上輕車都尉賜緋魚袋借紫臣宋咸謹序







進孔叢子表

臣咸言准中書札子以臣注孔叢子奉

聖旨附遞投進者集孔氏之遺書方成傳釋辱漢家之大詔廣示甄

收退省妄庸實深震悸臣咸誠惶誠恐頓首頓首臣竊以仲尼以還

子思而後聖嗣不絕賢才挺生皆道被於門人悉教施於侯氏古今

制度曲盡於討論禮樂綱衡並歸於矩矱成書雖在歷年滋深蓋著

非一時故語類三豕臣咸伏念上卷蓋闕里之事業中篇乃聖人之

子孫儻絕筆而未明則後代而何覩因以吏隙輒然管窺取諸史以

究尋用羣經而參驗既指歸而斯得復刪定以無繁爲注之文廣析

其理然小臣之學古當

真主之好儒有所述傳豈宜隱去遂刻其奏用文于天豈謂

體天法道欽文聰武聖神孝德

皇帝陛下惟極宜慈未嘗自聖雖微言而必采在介善以無遺遽降

玉音下從人欲臣是敢虔効編摩之制仰塵黈纈之明雖姓異卯金素非於廣學倘恩垂乙夜特賜於詳觀

詔近侍以刊修許善工而摹鏤參汲冢之蠹簡大行於時庶鄴人之緒言不墜于地則非獨孤生之有遇抑亦素教之增輝永期大忠仰酌鴻造臣無任干

天冒

聖激切屏營之至所注孔叢子七卷謹寫成五冊附遞投進以聞伏候

勅旨

嘉祐三年十二月十日廣南西路諸軍州水陸計轉運使兼本路勸農使朝散大夫尚書度支郎中上輕車都尉

賜紫金魚袋臣宋咸上表



孔叢子卷第一

嘉言第一

夫子適周見萇弘言終退萇弘語劉文公曰吾觀孔仲尼有聖人之表河目而隆顙黃帝之形貌也脩肱而龜背長九尺有六寸成湯之容體也然言稱先王躬履廉讓洽聞強記博物不窮抑亦聖人之興者乎劉子曰方今周室衰微而諸侯力爭孔丘布衣聖將安施萇弘曰堯舜文武之道或弛而墜禮樂崩喪其亦正其統紀而已矣既而夫子聞之曰吾豈敢哉亦好禮樂者也

陳惠公大城因起凌陽之臺未終而坐法死者數十人又執三監吏將殺之夫子適陳聞之見陳侯與俱登臺而觀焉夫子曰美哉斯臺自古聖王之爲城臺未有不戮一人而能致功若此者也陳侯默而退遽竊赦所執吏既而見夫子問曰昔周作靈臺亦戮人乎答曰文王之興附者六州六州之衆各以子道來故區區之臺未及期日而

已成矣何戮之有乎夫以少少之衆能立大大之功唯君爾

子張曰女子必漸乎二十而後嫁何也孔子曰十五許嫁而後從夫是陽動而陰應男唱而女隨之義也以爲紡績組紉織紝者女子之所有事也黼黻文章之美婦人之所有大功也必十五以往漸乎二十然後可以通乎此事通乎此事然後乃能上以孝於舅姑下以事夫養子也

宰我使于齊而反見夫子曰梁丘據遇虺毒三旬而後瘳朝齊君會大夫衆賓而慶焉弟子與在賓列大夫衆賓並復獻攻療之方弟子謂之曰夫所以獻方將爲病也今梁丘子已瘳矣而諸夫子乃復獻方方將安施意欲梁丘大夫復有虺害當用之乎衆坐默然無辭弟子此言何如夫子曰汝說非也夫三折肱爲良醫梁丘子遇虺毒而獲瘳諸有與之同疾者必問所以已之之方焉衆人爲此故各言其方欲售之以已人之疾也凡言其方者稱其良也且以參據所以已



之方優劣耳

夫子適齊晏子就其館既宴而私焉曰齊其危矣譬若載無轄之車以臨千仞之谷其不顛覆亦難冀也子吾心也子以齊爲游息之館當或可救子幸不吾隱也夫子曰夫死病不可爲醫夫政令者人君之銜轡所以制下也今齊君失之已久矣子雖欲挾其軛而扶其輪良弗及也抑猶可以終齊君及子之身過此以往齊其田氏矣

齊東郭亥欲攻田氏執贄見夫子而訪焉夫子曰子爲義也丘不足與計事揖子貢使答之子貢謂之曰今子士也位卑而圖大卑則人不附也圖大則人憚之殆非子之任也盍姑已乎夫以一縷之任繫千鈞之重上懸之於無極之高下垂之於不測之深旁人皆哀其絕而造之者不知其危子之謂乎馬方駭鼓而驚之繫方絕重而填之馬奔車覆六轡不禁繫絕於高墜入於深其危必矣東郭亥色戰而跪曰吾已矣願子無言旣而夫子告子貢曰東郭亥欲爲義者也子

亦告之以難易則可矣奚至懼之哉

宰我問君子尙辭乎孔子曰君子以理爲尙博而不要非所察也繁辭富說非所聽也唯知者不失理孔子曰吾於子取其言之近類也於賜取其言之切事也近類則足以諭之切事則足以懼之

論書第二

子張問曰聖人受命必受諸天而書云受終于文祖何也孔子曰受命於天者湯武是也受命於人者舜禹是也夫不讀詩書易春秋則不知聖人之心又無以別堯舜之禪湯武之伐也

子張問曰禮丈夫三十而室昔舜三十徵庸而書云有鰥在下曰虞舜何謂也曩者師聞諸夫子曰聖人在上君子在位則內無怨女外無曠夫堯爲天子而有鰥在下何也孔子曰夫男子二十而冠冠而後娶古今通義也舜父頑母嚚莫能圖室家之端焉故逮三十而謂之鰥也詩云娶妻如之何必告父母父母在則宜圖婚若已歿則已



之娶必告其廟今舜之鰥乃父母之頑嚚也雖堯爲天子其如舜何  
子夏問書大義子曰吾於帝典見堯舜之聖焉於大禹臯陶謨益稷  
見禹稷臯陶之忠勤功勳焉於洛誥見周公之德焉故帝典可以觀  
美大禹謨禹貢可以觀事臯陶謨益稷可以觀政洪範可以觀度秦  
誓可以觀議五誥可以觀仁甫刑可以觀誠通斯亡者則書之大義  
舉矣

孔子曰書之於事也遠而不闊近而不迫志盡而不怨辭順而不詔  
吾於高宗彤日見德有報之疾也苟由其道致其仁則遠方歸志而  
致其敬焉吾於洪範見君子之不忍言人之惡而質人之美也發乎  
中而見乎外以成文者其唯洪範乎

子張問曰堯舜之世一人不刑而天下治何則以教誠而愛深也龍  
子以爲教一而被以五刑敢問何謂孔子曰不然五刑所以佐教也  
龍子未可謂能爲書也

子夏讀書既畢而見於夫子夫子謂曰子何爲於書子夏對曰書之論事也昭昭然若日月之代明離離然若星辰之錯行上有堯舜之德下有二王之義凡商之所受書於夫子者志之於心弗敢忘也雖退而窮居河濟之間深山之中作壤室編蓬戶常於此彈琴瑟以歌先王之道則可以發憤懣喟忘己貧賤故有人亦樂之無人亦樂之上見堯舜之德下見三王之義忽不知憂患與死也夫子愀然變容曰嘻子殆可與言書矣雖然其亦表之而已未覩其裏也夫闚其門而不入其室惡覩其宗廟之奧百官之美乎

宰我問書云納于大麓烈風雷雨弗迷何謂也孔子曰此言人事之應乎天也堯既得舜歷試諸難已而納之於尊顯之官使大錄萬機之政是故陰陽清和五星來備烈風雷雨各以其應不有迷錯愆伏明舜之行合於天也

宰我曰敢問禋于六宗何謂也孔子曰所宗者六皆潔祀之也埋少



牢於太昭所以祭時也祖迎於坎壇所以祭寒暑也主於郊宮所以祭日也夜明所以祭月也幽禋所以祭星也雩禋所以祭水旱也禋于六宗此之謂也

書曰茲予大享于先王爾祖其從與享之季桓子問曰此何謂也孔子曰古之王者臣有大功死則必祀之於廟所以殊有績勸忠勤也盤庚舉其事以厲其世臣故稱焉桓子曰天子之臣有大功者則旣然矣諸侯之臣有大功者可以如之乎孔子曰勞能定國功加於民大臣死難雖食之公廟可也桓子曰其位次如何孔子曰天子諸侯之臣生則有列於朝死則有位於廟其序一也

書曰維高宗報上甲微定公問曰此何謂也孔子對曰此謂親盡廟毀有功而不及祖有德而不及宗故於每歲之大嘗而報祭焉所以昭其功德也公曰先君僖公功德前行可以與於報乎孔子曰丘聞昔虞夏商周以帝王行此禮者則有矣自此以下未之知也

定公問曰周書所謂庸庸祗祗威威顯民何謂也孔子對曰不失其道明之於民之謂也夫能用則正治矣敬可敬則尙賢矣畏可畏則服刑恤矣君審此三者以示民而國不興未之有也

子張問書云奠高山何謂也孔子曰高山五嶽定其差秩祀所視焉子張曰其禮如何孔子曰牲幣之物五嶽視三公而各山視子男子張曰仁者何樂於山孔子曰夫山者歸然高子張曰高則何樂爾孔子曰夫山草木植焉鳥獸蕃焉財用出焉直而無私焉四方皆伐焉直而無私興吐風雲以通乎天地之間陰陽和合雨露之澤萬物以成百姓咸饗此仁者之所以樂乎山也

孟懿子問書曰欽四鄰何謂也孔子曰王者前有疑後有丞左有輔右有弼謂之四近言前後左右近臣當畏敬之不可以非其人也周文王胥附奔輳先後禦侮謂之四鄰以免乎牖里之害懿子曰夫子亦有四鄰乎孔子曰吾有四友焉自吾得回也門人加親是非胥附



乎自吾得賜也遠方之士日至是非奔轅乎自吾得師也前有光後有輝是非先後乎自吾得由也惡言不至於門是非禦侮乎

孔子見齊景公梁丘據自外而至公曰何遲對曰陳氏戮其小臣臣有辭焉是故遲公笑而目孔子曰周書所謂明德慎罰陳子明德也罰人而有辭非不慎矣孔子答曰昔康叔封衛統三監之地命爲孟侯周公以成王之命作康誥焉稱述文王之德以成勅誡之文其書曰惟乃丕顯考文王克明德慎罰克明德者能顯用有德舉而任之也慎罰者弁心而慮之衆平然後行之致刑錯也此言其所任不失德所罰不失罪不謂己德之明也公曰寡人不有過言則安得聞君子之教也

書曰其在祖甲不義惟王公西赤曰聞諸晏子湯及太甲祖乙武丁天下之大君夫太甲爲王居喪行不義同稱大君何也孔子曰君子之於人計功以除過太甲卽位不明居喪之禮而干冢宰之政伊尹

放之于桐憂思三年追悔前愆起而復位謂之明王以此觀之雖四於三王不亦可乎

魯哀公問書稱夔曰於予擊石拊石百獸率舞庶尹允諧何謂也孔子對曰此言善政之化乎物也古之帝王功成作樂其功善者其樂和樂和則天地且猶應之况百獸乎夔爲帝舜樂正實能以樂盡治理之情公曰然則政之大本莫尙夔乎孔子曰夫樂所以歌其成功非政之本也衆官之長旣成熙熙然後樂乃和焉公曰吾聞夔一足有異於人信乎孔子曰昔重黎舉夔爲進又欲求人而佐焉舜曰夫樂天地之精也唯聖人爲能和六律均五聲和樂之本以通八風夔能若此一而足矣故曰一足非一足也公曰善

記義第三

季桓子以粟千鍾餼夫子夫子受之而不辭旣而以頒門人之無者子貢進曰季孫以夫子貧故致粟夫子受之而以施人無乃非季孫



之意乎子曰何對曰季孫以爲惠也子曰然吾得千鍾所以受而不辭者爲季孫之惠且以爲寵也夫受人財不以成富與季孫之惠於一人豈若惠數百人哉

秦莊子死孟武伯問於孔子曰古者同寮有服乎答曰然同寮有相友之義貴賤殊等不爲同官聞諸老聃昔者虢叔閔天太顛散宜生南宮括五臣同寮比德以贊文武及虢叔死四人者爲之服朋友之服古之達禮者行之也

公父文伯死室人有從死者其母怒而不哭相室諫之其母曰孔子天下之賢人也不用於魯退而去是子素宗之而不能隨今死而內人從死者二人焉若此於長者薄於婦人厚也旣而夫子聞之曰季氏之婦尙賢哉子路愀然對曰夫子亦好人之譽己乎夫子死而不哭是不慈也何善爾子曰怒其子之不能隨賢所以爲尙賢者吾何有焉其亦善此而已矣

衛出公使人問孔子曰寡人之任臣無大小一一自言問觀察之猶復失人何故答曰如君之言此乃所以失之也人既難知非言問所及觀察所盡且人君之慮者多多慮則意不精以不精之意察難知之人宜其有失也君未之聞乎昔者舜臣堯官才任士堯一從之左右曰人君用士當自任耳目而取信於人無乃不可乎堯曰吾之舉舜已耳目之矣今舜所舉人吾又耳目之是則耳目人終無已也君苟付可付則己不勞而賢才不失矣

子貢問曰昔孫文子以衛侯哭之不哀知其將爲亂不敢捨其重器而行盡實諸戚而善晉大夫二十人或稱其知何如孔子曰吾知其爲罪人未知其爲知也子貢曰敢問何謂也子曰食其祿者必死其事孫子知衛君之將不君不念伏死以爭而素規去就尸利攜貳非人臣也臣而有不臣之心明君所不赦幸哉孫子之以此免戮也孔子使宰子使于楚楚昭王以安車象飾因宰子以遺孔子焉宰子



曰夫子無以此爲也王曰何故對曰臣以其用思其所在觀之有以知其然王曰言之宰予對曰自臣侍從夫子以來竊見其言不離道動不違仁貴義尙德清素好儉仕而有祿不以爲積不合則去退無吝心妻不服綵妾不衣帛車器不彤馬不食粟道行則樂其治不行則樂其身此所以爲夫子也若夫觀目之靡麗窈窕之淫音夫子過之弗之視遇之弗之聽也故臣知夫子之無用此車也王曰然則夫子何欲而可對曰方今天下道德寢息其志欲興而行之天下誠有欲治之君能行其道則夫子雖徒步以朝固猶爲之何必遠辱君之重貶乎王曰乃今而後知孔子之德也大矣宰予歸以告孔子孔子曰二三子以予之言何如子貢對曰未盡夫子之美也夫子德高則配天深則配海若予之言行事之實也子曰夫言貴實使人信之舍實何稱乎是賜之華不若予之實也

孔子適齊景公讓登夫子降一等景公三辭然後登既坐曰夫子

降德辱臨寡人寡人以爲榮也而降階以遠自絕於寡人未知所以爲罪孔子答曰君惠顧外臣君之賜也然以匹夫敵國君非所敢行也雖君私之其若義何

顏籬善事親子路義之後籬以非罪執於衛將死子路請以金贖焉衛人將許之既而二子納金於子路以入衛或謂孔子曰受人之金以贖其私昵義乎子曰義而贖之貧取於友非義而何愛金而令不辜陷辟凡人且猶不忍况二子於由之所親乎詩云如可贖兮人百其身苟出金可以生人雖百倍古人不以爲多故二子行其欲由也成其義非汝之所知也

孔子讀詩及小雅喟然而嘆曰吾於周南召南見周道之所以盛也於柏舟見匹夫執志之不可易也於淇奧見學之可以爲君子也於考槃見遁世之士而不悶也於木瓜見苞苴之禮行也於緇衣見好賢之心至也於鷄鳴見古之君子不忘其敬也於伐檀見賢者之先



事後食也於蟋蟀見陶唐儉德之大也於下泉見亂世之思明君也於七月見豳公之所以造周也於東山見周公之先公而後私也於狼跋見周公之遠志所以爲聖也於鹿鳴見君臣之有禮也於彤弓見有功之必報也於羔羊見善政之有應也於節南山見忠臣之憂世也於蓼莪見孝子之思養也於楚茨見孝子之思祭也於裳裳者華見古之賢者世保其祿也於采芣見古之明王所以敬諸侯也孔子晝息於室而鼓琴焉閔子自外聞之以告曾子曰嚮也夫子之音清澈以和淪入至道今也更爲幽沈之聲幽則利欲之所爲發沈則貪得之所爲施夫子何所感之若是乎吾從子入而問焉曾子曰諾二子入問孔子孔子曰然汝言是也吾有之向見猫方取鼠欲其得之故爲之音也汝二人者孰識諸曾子對曰是閔子夫子曰可與聽音矣





孔叢子卷第二

刑論第四

仲弓問古之刑教與今之刑教孔子曰古之刑省今之刑繁其爲教古有禮然後有刑是以刑省今無禮以教而齊之以刑刑是以繁書曰伯夷降典折民維刑謂先禮以教之然後維以刑折之也夫無禮則民無恥而正之以刑故民苟免

孔子適衛衛將軍文子問曰吾聞魯公父氏不能聽獄信乎孔子答曰不知其不能也夫公父氏之聽獄有罪者懼無罪者恥文子曰有罪者懼是聽之察刑之當也無罪者恥何乎孔子曰齊之以禮則民恥矣刑以止刑則民懼矣文子曰今齊之以刑刑猶弗勝何禮之齊孔子曰以禮齊民譬之於御則轡也以刑齊民譬之於御則鞭也執轡於此而動於彼御之良也無轡而用策則馬失道矣文子曰以御言之右手執轡左手運策不亦速乎若徒轡無策馬何懼哉孔子曰

吾聞古之善御者執轡如組兩驂如舞非策之助也是以先王盛於禮而薄於刑故民從命今也廢禮而尚刑故民彌暴文子曰吳越之俗無禮而亦治何也孔子曰夫吳越之俗男女無别同川而浴民輕相犯故其刑重而不勝由無禮也中國之教爲外內以别男女異器服以殊等類故其民篤而法其刑輕而勝由有禮也

孔子曰民之所以生者衣食也上不教民民匱其生飢寒切於身而不爲非者寡矣故古之於盜惡之而不殺也今不先其教而一殺之是以罰行而善不反刑張而罪不省夫赤子知慕其父母由審故也況乎爲政興其賢者而廢其不賢以化民乎知審此二者則上盜先息

書曰茲殷罰有倫子張問曰何謂也孔子曰不失其理之謂也今諸侯不同德每君異法折獄無倫以意爲限是故知法之難也子張曰古之知法者與今之知法者異乎孔子曰古之知法者能遠獄今之



知法者不失有罪不失有罪其於恕寡矣能遠於獄其於防深矣寡  
恕近乎濫防深治乎本書曰維敬五刑以成三德言敬刑所以爲德  
矣

書曰非從維從孔子曰君子之於人也有不語也無不聽也況聽訟  
乎必盡其辭矣夫聽訟者或從其情或從其辭辭不可從必斷以情  
書曰人有小罪非眚乃惟終自作不典式爾有厥罪小乃不可不殺  
乃有大罪非終乃惟眚災適爾既道極厥辜時乃不可殺曾子問聽  
獄之術孔子曰其大法也三焉治必以寬寬之之術歸於察察之之  
術歸於義是故聽而不寬是亂也寬而不察是慢也察而不中義是  
私也私則民怨故善聽者聽不越辭辭不越情情不越義書曰上下  
比罰亡僭亂辭

書曰哀矜折獄仲弓問曰何謂也孔子曰古之聽訟者察貧賤哀孤  
獨及鰥寡老弱不肖而無告者雖得其情必哀矜之死者不可生斷

者不可屬若老而刑之謂之悖弱而刑之謂之克不赦過謂之逆率過以小罪謂之挾故宥過赦小罪老弱不受刑先王之道也書曰大辟疑赦又曰與其殺不辜寧失不經

書曰若保赤子子張問曰聽訟可以若此乎孔子曰可哉古之聽訟者惡其意不惡其人求所以生之不得其所以生乃刑之君必與衆共焉愛民而重棄之也今之聽訟者不惡其意而惡其人求所以殺是反古之道也

孟氏之臣叛武伯問孔子曰如之何答曰臣人而叛天下所不容也其將自反子姑待之三旬果自歸孟氏武伯將執之訪於夫子夫子曰無也子之於臣禮意不至是以去子今其自反罪以反除又何執焉子脩禮以待之則臣去子將安往武伯乃止

記問第五

夫子閒居喟然而嘆子思再拜請曰意子孫不脩將忝祖乎羨堯舜



之道恨不及乎夫子曰爾孺子安知吾志子思對曰伋於進膳亟聞夫子之教其父析薪其子弗克負荷是謂不肖伋每思之所以大恐而不解也夫子忻然笑曰然乎吾無憂矣世不廢業其克昌乎

子思問於夫子曰爲人君者莫不知任賢之逸也而不能任賢何故子曰非不欲也所以官人失能者由於不明也其君以譽爲賞以毀爲罰賢者不居焉

子思問於夫子曰伋聞夫子之詔正俗化民之政莫善於禮樂也管子任法以治齊而天下稱仁焉是法與禮樂異用而同功也何必但禮樂哉子曰堯舜之化百世不輟仁義之風遠也管仲任法身死則法息嚴而寡恩也若管仲之知足以定法材非管仲而專任法終必亂成矣

子思問於夫子曰物有形類事有真僞必審之奚由子曰由乎心心之精神是乎聖推數究理不以物疑周其所察聖人難諸

趙簡子使聘夫子夫子將至焉及河聞竇鳴犢與舜華之見殺也

孔子

家語云殺竇準鳴犢及舜華又云趙簡子須此二人而後從政則竇準鳴犢爲一人舜華爲一人也史記世家云竇鳴犢與舜華徐廣注

準或作鳴鐸竇準今備存之迴輿而旋之衛息邾遂爲操曰周道衰微禮樂凌遲

文武既墜吾將焉師周遊天下靡邦可依鳳鳥不識珍寶梟鴟眷然顧之慘焉心悲巾車命駕將適唐都黃河洋洋悠悠之魚臨津不濟還轅息邾傷予道窮哀彼無辜翱翔于衛復我舊廬從吾所好其樂只且

哀公使以幣如衛迎夫子而卒不能當故夫子作丘陵之歌曰登彼丘陵剝施其阪仁道在邇求之若遠遂迷不復自嬰屯蹇喟然回慮題彼泰山鬱確其高梁甫回連枳棘充路陟之無緣將伐無柯患茲蔓延惟以永歎涕霑潺湲

楚王使使奉金帛聘夫子宰予冉有曰夫子之道於是行矣遂請見問夫子曰太公勤身苦志八十而遇文王孰與許由之賢夫子曰許



由獨善其身者也太公兼利天下者也然今世無文王之君也雖有  
太公孰能識之乃歌曰大道隱兮禮爲基賢人竄兮將待時天下如  
一欲何之一作待  
清時

叔孫氏之車卒曰子鉏商樵於野而獲獸焉衆莫之識以爲不祥棄  
之五父之衢冉有告夫子曰有麇而肉角豈天之妖乎夫子曰今何  
在吾將觀焉遂往謂其御高柴曰若求之言其必麟乎到視之果信  
言偃問曰飛者宗鳳走者宗麟爲其難致也敢問今見其誰應之子  
曰天子布德將致太平則麟鳳龜龍先爲之祥今周宗將滅天下無  
主孰爲來哉遂泣曰子之於人猶麟之於獸也麟出而死吾道窮矣  
乃歌曰唐虞世兮麟鳳遊今非其時來何求麟兮麟兮我心憂

雜訓第六

子上請所習於子思子思曰先人有訓焉學必由聖所以致其材也  
厲必由砥所以致其刃也故夫子之教必始於詩書而終於禮樂雜

說不與焉又何請

子思謂子上曰白乎吾嘗深有思而莫之得也於學則寤焉吾嘗企有望而莫之見也登高則覩焉是故雖有本性而加之以學則無惑矣

懸子問子思曰吾聞同聲者相求同志者相好子之先君見子產則兄事之而世謂子產仁愛稱夫子聖人是謂聖道事仁愛也吾未諭其人之孰先後也故質於子子思曰然子之問也昔季孫問子游亦若子之言也子游答曰以子產之仁愛譬夫子其猶浸水之與膏雨乎康子曰子產死鄭人丈夫舍玦珮婦女舍珠璣巷哭三月竽瑟不作夫子之死也吾未聞魯人之若是也奚故哉子游曰夫浸水之所及也則生其所不及則死故民皆知焉膏雨之所生也廣莫大焉民之受賜也普矣莫識其由來者上德不德是以無德季孫曰善懸子曰其然



孟子車尚幼請見子思子思見之甚悅其志命子上侍坐焉禮敬子車甚崇子上不願也客退子上請曰白聞士無介不見女無媒不嫁孟孺子無介而見大人悅而敬之白也未諭敢問子思曰然吾昔從夫子於鄉遇程子於途傾蓋而語終日而別命子路將束帛贈焉以其道同於君子也今孟子車孺子也言稱堯舜性樂仁義世所希有也事之猶可況加敬乎非爾所及也

子思在魯使以書如衛問子上子上北面再拜受書伏讀然後與使者宴遂爲復書返中庭北面再拜以授使者既受書然後退使者還魯問子思曰吾子堂上南面立授臣書事畢送臣子上中庭拜授臣書而不送何也子思曰拜而不送敬也使人而送之賓也

魯人有同姓死而弗吊者人曰在禮當免不免當吊不吊有司罰之如之何子之無吊也答曰吾以其疏遠也子思聞之曰無恩之甚也昔者季孫問於夫子曰百世之宗有絕道乎子曰繼之以姓義無絕

也故同姓爲宗合族爲屬雖國君之尊不廢其親所以崇愛也是以綴之食序列之昭穆萬世婚姻不通忠篤之道然也

魯穆公訪於子思曰寡人不德嗣先君之業三年矣未知所以爲令名者且欲掩先君之惡以揚先君之善使談者有迷焉爲之若何願先生教之也子思答曰以伋所聞舜禹之於其父非勿欲也以爲私情之細不如公義之大故弗敢私之焉耳責以虛飾之教又非伋所得言公曰思之可以利民者子思曰願有惠百姓之心則莫如一切除非法之事也毀不居之室以賜窮民奪嬖寵之祿以振困匱無令人有悲怨而後世有聞見抑亦可乎公曰諾

縣子問子思曰顏回問爲邦夫子曰行夏之時若是殷周異政爲非乎子思曰夏數得天堯舜之所同也殷周之王征伐革命以應乎天因改正朔若云天時之改爾故不相因也夫受禪於人者則襲其統受命於天者則革之所以神其事如天道之變然也三統之義夏得



其正是以夫子云

穆公問於子思曰立太子有常乎答曰有之在周公之典公曰昔文王舍適而立其次微子舍孫而立其弟是何法也子思曰殷人質而尊其尊故立弟周人文而親其親故立子亦各其禮也文質不同其禮則異文王舍適立其次權也公曰苟得行權豈唯聖人唯賢與愛立也子思曰聖人不以權教故立制垂法順之爲貴若必欲犯何有於異公曰舍賢立聖舍愚立賢何如子思曰唯聖立聖其文王乎不及文王者則各賢其所愛不殊於適何以限之必不能審賢愚之分請父兄羣臣卜於祖廟亦權之可也

孟軻問牧民何先子思曰先利之曰君子之所以教民亦有仁義而已矣何必曰利子思曰仁義固所以利之也上不仁則下不得其所上不義則下樂爲亂也此爲不利大矣故易曰利者義之和也又曰利用安身以崇德也此皆利之大者也

居衛第七

子思居衛言苟變於衛君曰其材可將五百乘君任軍旅率得此人則無敵於天下矣衛君曰吾知其材可將然變也嘗爲吏賦於民而食人二鷄子以故弗用也子思曰夫聖人之官人猶大匠之用木也取其所長棄其所短故杞梓連抱而有數尺之朽良工不棄何也知其所妨者細也卒成不訾之器今君處戰國之世選爪牙之士而以二卵焉棄千城之將此不可使聞於鄰國者也衛君再拜曰謹受教矣

子思適齊齊君之嬖臣美鬚眉立乎側齊君指之而笑且言曰假貌可相易寡人不惜此之鬚眉於先生也子思曰非所願也所願者唯君脩禮義富百姓而伋得寄帑於君之境內從襁負之列其庸多矣若無此鬚鬣非伋所病也昔堯身脩十尺眉乃八彩實聖舜身脩八尺有奇面頷無毛亦聖禹湯文武及周公勤思勞體或折臂望視或



禿髡背僂亦聖不以鬚眉美鬣爲稱也人之賢聖在德豈在貌乎且吾先君生無鬚眉而天下王侯不以此損其敬由是言之伋徒患德之不邵不病毛鬣之不茂也

子思謂子上曰有可以爲公侯之尊而富貴人衆不與焉者非唯志乎成其志者非唯無欲乎夫錦繡紛華所服不過溫體三牲大牢所食不過充腹知以身取節者則知足矣苟知足則不累其志矣

曾子謂子思曰昔者吾從夫子遊於諸侯夫子未嘗失人臣之禮而猶聖道不行今吾觀子有傲世主之心無乃不容乎子思曰時移世異各有宜也當吾先君周制雖毀君臣固位上下相持若一體然夫欲行其道不執禮以求之則不能入也今天下諸侯方欲力爭競招英雄以自輔翼此乃得士則昌失士則亡之秋也伋於此時不自高人將下吾不自貴人將賤吾舜禹揖讓湯武用師非故相詭乃各時也

子思在齊齊尹文子生子不類怒而杖之告子思曰此非吾子也吾妻殆不婦吾將黜之子思曰若子之言則堯舜之妃復可疑也此二帝聖者之英而丹朱商鈞不及匹夫以是推之豈可類乎然舉其多者有此父斯有此子人道之常也若夫賢父之有愚子此由天道自然非子之妻之罪也尹文子曰先生止之願無言文留妻矣

孟軻問子思曰堯舜文武之道可力而致乎子思曰彼人也我也稱其言履其行夜思之晝行之滋滋焉汲汲焉如農之赴時商之趨利惡有不至者乎

子思謂孟軻曰自大而不脩其所以大不大矣自異而不脩其所以異不異矣故君子高其行則人莫能偕也遠其志則人莫能及也禮接於人人不敢慢辭交於人人不敢侮其唯高遠乎

申祥問曰殷人自契至湯而王周人自弃至武王而王同讐之後也周人追王太王王季文王而殷人獨否何也子思曰文質之異也周



人之所追太王王迹起焉又曰文王受命斷虞芮之訟伐崇邦退犬夷追王太王王季何也子思曰狄人攻太王太王召耆老而問焉曰狄人何來耆老曰欲得菽粟財貨太王曰與之與之至無狄人不止大王又問耆老曰狄人何欲耆老曰欲土地大王曰與之耆老曰君不爲社稷乎大王曰社稷所以爲民也不可以所爲亡民也耆老曰君縱不爲社稷不爲宗廟乎太王曰宗廟者私也不可以吾私害民遂杖策而去過梁山止乎岐下豳民之東脩奔而從之者三千乘一止而成三千乘之邑此王道之端也成王於是追而王之王季其子也承其業廣其基焉雖同追王不亦可乎

羊客問子思曰古之帝王中分天下使二公治之謂之二伯周自后稷封爲王者後子孫據國至太王王季文王此固世爲諸侯矣焉得爲西伯乎子思曰吾聞諸子夏殷王帝乙之時王季以功九命作伯受珪瓚鉅鬯之賜故文王因之得專征伐此以諸侯爲伯猶周召之

君爲伯也

子思年十六適宋宋大夫樂朔與之言學焉朔曰尙書虞夏數四篇善也下此以訖于秦費効堯舜之言耳殊不知也子思答曰事變有極正自當爾假令周公堯舜更時易處其書同矣樂朔曰凡書之作欲以喻民也簡易爲上而乃故作難知之辭不亦繁乎子思曰書之意兼複深奧訓詁成義古人所以爲典雅也昔魯委巷亦有似君之言者伋答之曰道爲知者傳苟非其人道不貴矣今君何似之甚也樂朔不悅而退曰孺子辱吾其徒曰此雖以宋爲舊然世有讐焉請攻之遂圍子思宋君聞之駕而救子思子思旣免曰文王厄於羑里作周易祖君屈於陳蔡作春秋吾困於宋可無作乎於是撰中庸之書四十九篇

孔叢子卷第二



孔叢子卷第三

巡守第八

子思遊齊陳莊伯與登泰山而觀見古天子巡守之銘焉陳子曰我  
生獨不及帝王封禪之世子思曰子不欲爾今周室卑微諸侯無霸  
假以齊之義率鄰國以輔文武子孫之有德者則齊桓晉文之事不  
足言也陳子曰非不悅斯道力不堪也子聖人之後吾願有聞焉敢  
問昔聖帝明王巡守之禮可得聞乎子思曰凡求聞者爲求行之也  
今子自計必不能行欲聞何爲陳子曰吾雖不敏亦樂先王之道於  
子何病而不吾告也子思乃告之曰古者天子將巡守必先告於祖  
禰命史告羣廟及社稷圻內各山大川告者七日而徧親告用牲史  
告用幣申命冢宰而後道而出或以遷廟之主行載于齋車每舍奠  
焉及所經五岳四瀆皆有牲幣歲二月東巡守至于岱宗柴于上帝  
望秩于山川所過諸侯各待于境天子先問百年者所在而親見之

然後覲方岳之諸侯有功德者則發爵賜服以順陽義無功者則削黜貶退以順陰義命史採民詩謠以觀其風命市納賈察民之所好惡以知其志命典禮正制度均量衡考衣服之等協時月日辰入其疆土地荒穢遺老失賢培克在位則君免山川社稷有不親舉者則貶秩削土土荒民遊爲無教無教者則君退民淫僭上爲無法無法者則君罪入其疆土地墾辟養老尊賢俊傑在位則君有慶遂南巡五月至于南岳又西巡八月至于西岳又北巡十有一月至于北岳其禮皆如岱宗歸反舍于外次三日齋親告于祖禰用特命有司告羣廟社稷及圻內名山大川而後入聽朝此古者明王巡守之禮也陳子曰諸侯朝乎天子盟會霸主則亦告宗廟山川乎子思曰告哉陳子曰王者巡守不及四岳諸侯盟會不越鄰國則其禮同乎異乎子思曰天子封圻千里公侯百里伯七十里子男五十里虞夏殷周之常制也其或出此封者則其禮與巡守朝會無變其不越於封境



雖行如在國陳子曰旨哉古之義也吾今而後知不學者淺之爲人也

### 公儀第九

魯人有公儀休者砥節勵行樂道好古恬於榮利不事諸侯子思與之友穆公因子思欲以爲相謂子思曰公儀子必輔寡人參分魯國而與之一子其言之子思對曰如君之言則公儀子愈所以不至也君若飢渴待賢納用其謀雖蔬食水飲飯亦願在下風今徒以高官厚祿鈎餌君子無信用之意公儀子之智若魚鳥可也不然則彼將終身不躡乎君之庭矣且臣不佞又不任爲君操竿下釣以傷守節之士也

閻丘溫見田氏將必危齊欲以其邑叛而適魯穆公聞之謂子思曰子能懷之則寡人割邑如其邑以償子子思曰飯雖能之義所不爲也公曰何子思對曰彼爲人臣君將顛弗能扶而叛之逆臣制國弗

能以其衆死而逃之此罪誅之人也伋縱不能討而又要利以召姦非忍行也

穆公問子思曰吾聞龐攔氏子不孝其行何如對曰臣聞明君之爲政尊賢以崇德舉善以勸民則四封之內孰敢不化若夫過行是細人之所識不治其本而問其過臣不知所以也公曰善

穆公謂子思曰子之書所記夫子之言或者以謂子之辭也子思曰臣所記臣祖之言或親聞之者有聞之於人者雖非其正辭然猶不失其意焉且君之所疑者何公曰於事無非子思曰無非所以得臣祖之意也就如君言以爲臣之辭臣之辭無非則亦所宜貴矣事既不然又何疑焉

穆公謂子思曰縣子言子之爲善不欲人譽己信乎子思對曰非臣之情也臣之修善欲人知之知之而譽臣是臣之爲善有勸也此所願而不可得者也若臣之修善而人莫知莫知則必毀臣是臣之爲



善而受毀也此臣所不願而不可避者也若夫鷄鳴爲善孜孜以至夜半而曰不欲人之知恐人之譽己臣以謂斯人也者非虛則愚也胡毋豹謂子思曰子好大世莫能容子也蓋亦隨時乎子思曰大非所病所病不大也凡所以求容於世爲行道也毀道以求容道何行焉大不見容命也毀大而求容罪也吾弗改矣

子思居貧其友有饋之粟者受二車焉或獻樽酒束脩子思弗爲當也或曰子取人粟而辭吾酒脯是辭少而取多也於義則無名於分則不全而子行之何也子思曰然仍不幸而貧於財至於困乏將恐絕先人之祀夫所以受粟爲周乏也酒脯所以飲宴也方乏於食而乃飲宴非義也吾豈以爲分哉度義而行也或者擔其酒脯以歸

穆公問子思曰吾國可興乎子思曰可公曰爲之奈何對曰苟君與大夫慕周公伯禽之治行其政化開公家之惠杜私門之利結恩百姓脩禮鄰國其興也勃矣

子思曰吾之富貴甚易而人猶弗能夫不取於人謂之富不辱於人謂之貴不取不辱其於富貴庶矣哉

抗志第十

曾申謂子思曰屈己以伸道乎抗志以貧賤乎子思曰道伸吾所願也今天下王侯其孰能哉與屈己以富貴不若抗志以貧賤屈己則制於人抗志則不愧於道

子思居衛衛人釣於河得鰈魚焉其大盈車子思問之曰鰈魚魚之難得者也子如何得之對曰吾始下釣垂一魴之餌鰈過而弗視也更以豚之半體則吞之矣子思喟然曰鰈雖難得貪以死餌士雖懷道貪以死祿矣

子思居衛魯穆公卒縣子使乎衛聞喪而服謂子思曰子雖未臣魯父母之國也先君宗廟在焉奈何弗服子思曰吾豈愛乎禮不得也縣子曰請聞之答曰臣而去國君不掃其宗廟則不爲之服寓乎是



國而爲國服吾旣無列於魯而祭在衛吾何服哉是寄臣而服所寄之君則舊君無服明不二君之義也縣子曰善哉我未之思也

衛君言計非是而羣臣和者如出一口子思曰以吾觀衛所謂君不君臣不臣者也公丘懿子曰何乃若是子思曰人主自臧則衆謀不進事是而臧之猶却衆謀況和非以長惡乎夫不察事之是非而悅人之讚己闇莫甚焉不度理之所在而阿諛求容諂莫甚焉君闇臣諂以居百姓之上民弗與也若此不已國無類矣

子思謂衛君曰君之國事將日非矣君曰何故答曰有由然焉君出言皆自以爲是而卿大夫莫敢矯其非卿大夫出言亦皆自以爲是而士庶人莫敢矯其非君臣旣自賢矣而羣下同聲賢之賢之則順而有福矯之則逆而有禍故使如此如此則善安從生詩云具曰予聖誰知烏之雌雄抑亦似衛之君臣乎

衛君問子思曰寡人之政何如答曰無非君曰寡人不知其不肖亦

望其如此也子思曰希旨容媚則君親之中正弼非則君疏之夫能使人富貴貧賤者君也在朝之士孰肯舍所以見親而取其所以見疏乎是故競求射君之心而莫有非君之非者此臣所以無非也公曰然乎寡人之過也今知改矣答曰君弗能焉口順而心不懌者臨其事必疣君雖有命臣未敢受也

司徒文子改葬其叔父問服於子思子思曰禮父母改葬總既葬而除不忍無服送至親也非父母無服無服則弔服而加麻文子曰喪服既除然後乃葬則其服何服答曰三年之喪未葬服不變除何有焉期大功之喪服其所除之服以葬既葬而除之其虞也吉服以行事也

公叔木謂申祥曰吾於子思親而敬之子思未吾察也申祥以告曰人求親敬於子子何辱焉子思答曰義也申祥曰請聞之答曰公叔氏之子愛人之同己慢而不知賢夫其親敬非心見吾所可親敬也



則亦以人口而疏慢吾矣申祥曰其不知賢奈何答曰有龍穆者徒好飾弄辭說觀於坐席相人眉睫以爲之意天下之淺人也而公叔子交之橋子良脩實而不脩名爲善不爲人之知己不撞不發如大鍾然天下之深人也而公叔子與之同邑而弗能知此其所以爲愛同己而不知賢也

子思自齊反衛衛君館而問曰先生魯國之士然不以衛之褊小猶步玉趾而慰存之願有賜於寡人也子思曰臣羈旅於此而辱君之威尊亟臨華門其榮多矣欲報君以財幣則君之府藏已盈而侈又貧欲報君以善言恐未合君志而徒言不聽也顧未有可以報君者唯達賢爾衛君曰賢則固寡人之所願也子思曰未審君之願將何以爲君曰必用以治政子思曰君弗能也君曰何故答曰衛國非無賢才之士而君未有善政是賢才不見用故也君曰雖然願聞先生所以爲賢者答曰君將以名取士耶以實取士耶君曰必以實子思

曰衛之東境有李音者賢而有實者也君曰其父祖何也答曰世農夫也衛君乃盧胡大笑曰寡人不好農農夫之子無所用之且世臣之子未悉官之子思曰臣稱李音稱其賢才也周公大聖康叔大賢今魯衛之君未必皆同其祖考李音父祖雖善農則音亦未必與之同也君言世臣之子未悉官之則臣所謂有賢才而不見用果信矣臣之問君固疑取士不以實也今君不問李音之所以爲賢才而聞其世農夫因笑而不受則君取士果信名而不由實者也衛君屈而無辭

衛君曰夫道大而難明非吾所能也今欲學術何如子思曰君無然也體道者逸而不窮任術者勞而無功古之篤道君子生不足以喜之利何足以動之死不足以禁之害何足以懼之故明於死生之分通於利害之變雖以天下易其脛毛無所概於志矣是以與聖人居使窮士忘其貧賤使王公簡其富貴君無然也衛君曰善



齊王謂子思曰今天下擾擾諸侯無伯吾國大人衆圖帝何如子思曰不可也君不能去君貪利之心王曰何害子思曰夫水之性清而土壤汨之人之性安而嗜慾亂之故能有天下者必無以天下爲者也能有名譽者必無以名譽爲者也達此則其利心外矣

衛將軍文子之內子死復者曰皋媚女復子思聞之曰此女氏之字非夫氏之名也婦人於夫氏以姓氏稱禮也

費子陽謂子思曰吾念周室將滅泣涕不可禁也子思曰然此亦子之善意也夫能以智知可知而不能以智知未可知危之道也今以一人之身憂世之不治而泣涕不禁是憂河水之濁而泣清之也其爲無益莫大焉故微子去殷紀季之齊良知時也唯能不憂世之亂而患身之不治者可與言道矣

齊王戮其民不辜謂子思曰吾知其不辜而適觸吾忿故戮之以爲不足傷義也子思曰文王葬朽骨而天下知仁商紂斫朝涉而天下

稱暴夫義者不必徧利天下也暴者不必盡虐海內也以其所施而觀其意民乃去就焉今君因心之忿遷戮不辜以爲無傷於義此非臣之所敢知也王曰寡人實過乃今聞命請改之

衛公子交見於子思曰先生聖人之後執清高之操天下之君子莫不服先生之大名也交雖不敏竊慕下風願師先生之行幸顧卹之子思曰公子不宜也夫清高之節不以私自累不以利煩意擇天下之至道行天下之正路今公子紹康叔之緒處戰伐之世當務收英雄保其疆土非所以明否藏立規檢脩匹夫之行之時也

衛公子交饋馬四乘於子思曰交不敢以此求先生之歡而辱先生之潔也先生久降於鄙土蓋爲賓主之餼焉子思曰伋寄命以來度身以服衛之衣量腹以食衛之粟矣且又朝夕受酒脯及祭膳之賜衣食已優意氣已定以無行志未敢當車馬之貺禮雖有爵賜人不踰父兄今重違公子之盛旨則有詔禮之愆焉若何公子曰交已言



於君矣答曰不可爲人子者三賜不及車馬公子曰我未之聞也謹受教

穆公欲相子思子思不願將去魯魯君曰天下之主亦猶寡人也去將安之子思答曰蓋聞君子猶鳳也疑之則舉今君旣疑矣又以己限天下之君臣竊謂君之言過矣

齊王謂子思曰先生名高於海內吐言則天下之士莫不屬耳目今寡人欲相梁起起也名少願先生談說之也子思曰天下之士所以屬耳目者以佞之言是非當也今君使佞虛談於起則天下之士必改耳目矣耳目旣改又無益於起是兩之喪也故不敢承命齊君曰起之不善何也子思曰君豈未之知乎厚於財色必薄於德自然之道也今起以貪成富聞於諸侯而無救施之惠焉以好色聞於齊國而無男女之別焉有一於此猶受其咎而起二之能無累乎王曰寡人之言實過願先生救焉

子思見老萊子老萊子聞穆公將相子思老萊子曰若子事君將何以爲乎子思曰順吾性情以道輔之無死亡焉老萊子曰不可順子之性也子性惟太剛而傲不肖且又無所死亡非人臣也子思曰不肖故爲人之所傲也夫事君道行言聽則何所死亡道不行言不聽則亦不能事君所謂無死亡也老萊子曰子不見夫齒乎雖堅剛卒盡相摩舌柔順終以不弊子思曰吾不能爲舌故不能事君

小爾雅第十一

廣詁第一

淵懿邃蹟深也封巨莫莽艾祁大也頒賦鋪敷布也蓋戴燾蒙冒覆也鐘崇府衆積灌叢樸聚也閱搜履庀具也攻爲詁相旬宰營匠治也蠲被裡屑潔也勿蔑微末沒無也隆巢岸峻高也逼昵附切局鄰傳戚近也邵媚旨伐美也賢哀繁優饒夥多也幾蔡模臬法也爰換變貿交更易也生造奏詣進也索搴探裏鉤掠採略取也聞徹接通



達也固歷彌宿舊尙久也彌愈滋強益也赫數爽曉昕著讚曙明也階附襲就因也封畛際限疆略界也承第班列次也戶峻格扈正也幽惝闇昧冥也最凡目質要也疆窮充竟也而乃爾若汝也控轡挽引也承贊涼助佐也尋由以用也要捷集載成也肆赴捷疾也造之如適也掇督撫拾也肄子燼餘也拓斥啓闢開也杜實充物塞也實物滿也獎率厲勸也勤勉事力也經屑省過也闕缺間隙也迭遞交更也燿剗沒滅也玄黔驪黝黑也縞皓素白也彤梓頰緼赤也淫沉滅沒也載功物事也

廣言第二

晏明陽也盱晏晚也算麗數也窆艾老也僉皆同也交校報也舒布展也揚翥舉也索略求也獲干得也奚害何也里度居也周浹匝也充該備也列厥陳也輶駟輿也廢措置也駕乘凌也收戢斂也囚禁錄也掌司主也偏贅屬也麗著思也載略行也沓襲合也抵享當也

庚傲近也脩杼長也校戰交也謁復白也勅質正也裔蔑末也延衍  
散也末沒終也辨詰別也菲涼薄也復旋還也祖巽送也卬我也姓  
命孛子也諧顛和也悛寤覺也憾猜恨也艾盡止也憫忿也奸犯也  
汨滑亂也縮紬抽也暨捷及也苞跋本也肆臬極也睇題視也犯肆  
突也束縻縛也肆從遂也放投棄也莽蕪草也暴暎曬也炊也晞爇  
乾也迪跡蹈也衍演廣也袤縱長也荷揭擔也仍再也徇歸也工官  
也稽考也顛殞也躋陞也戕殘也勦截也辟除也恩惠也謫責也間  
非也順退也抗禦也斬取也蚩戲也褊狹也慕教也沮疑也虧損也  
毀壞也判散也蔽斷也交俱也俘罰也夷傷也枳害也適閑也締閉  
也靡細也辨使也牧臨也嘗試也賴贏也若乃也嗟發聲也奏爲也  
振救也庸償也買價也贍足也曹耦也麗兩也驟數也逞快也越遠  
也姑且也哿可也釋解也庸善也荐重也登升也勵勉也赫顯也韙  
是也不莊也佞才也暨息也話善也愿謹也丰豐也都盛也腴厚也



肆緩也競逐也紀基也慙強也薄迫也燁炊也資取也質信也餽饋也憑依也藉借也際接也廩外也閔限也廬寄也萃集也蓬倅也尤怪也瞢慚也索空也素故也視比也徨往也矜惜也狃怏也覲望也何任也御侍也殿填也選擇也宣示也

廣訓第三

諸之也乎也旃焉也惡乎於何也烏乎吁嗟也吁嗟嗚呼也有所歎美有所傷痛隨事爲義也無念念也無寧寧也不顯顯也不承承也不肖不似也繩之譽之也詰朝明旦也遐不黃耆言壽考也公孫碩膚德音不瑕道成王大美聲稱遠也鄂不韡韡言韡韡也我從事獨賢勞事獨多也魴鱖甫甫語其大也麀鹿麀麀語其衆也海物維錯錯雜也雜毛曰毳雜彩曰繪雜言曰嘯

廣義第四

凡無妻無夫通謂之寡寡夫曰癯寡婦曰嫠妾婦之賤者謂之屬婦

屬逮也逮婦之名言其徵也非分而得謂之幸詰責以辭謂之讓男女不以禮交謂之淫上淫曰烝下淫曰報旁淫曰通不直失節謂之慚慚愧也面慚曰難心慚曰慙體慚曰浚

廣名第五

諱死謂之大行死而復生謂之蘇疾甚謂之陆請天子命曰未可以戚先王請諸侯命曰未可以近先君請大夫命曰未可以從先子空棺謂之櫬有屍謂之柩饋死者謂之賵衣服謂之襚埋柩謂之殮殮坎謂之池擴謂之窆下棺謂之窆填窆謂之封宰塚也壟塋也無主之鬼謂之殤

廣服第六

治絲曰織織繒也麻紵葛曰布布通名也纊綿也絮之細者曰纊繒之精者曰縞縞之麤者曰素葛之精者曰絺麤者曰絺在首謂之元服弁髦大古布冠冠而敝之者也題定也顛顏頰額也璽謂之印紱



謂之綬檐褕謂之童容布褐而紘之謂之藍縷袴謂之裳蔽膝謂之  
衽帶之垂者謂之厲大巾謂之冪覆帳謂之幄幄幕也簣第牀也大  
扇謂之篲杖謂之挺鍵謂之籥棊局謂之奕在足謂之屨屨尊者曰  
達屨達謂之金烏烏而金絢也

廣器第七

射有張布謂之侯侯中者謂之鵠鵠中者謂之正正方二尺正中者  
謂之鰲鰲方六寸棘戟也鉞鉞斧也干馘盾也戈句予戟也刃之削  
謂之室室謂之鞞鞞珣鞞之飾也矢服謂之彀小舩謂之艇艇之小  
者曰舩船頭謂之舳尾謂之艫楫謂之橈車轅上者謂之轆轤謂之  
輶輶謂之枕較謂之幹衡軛也軛上謂之烏喙纍綆繃也縶索也大  
者謂之索小者謂之繩趾而戾之爲縶繆而紵之爲索墉城地也墉  
墉謂之陴高平謂之大原汪池也水之北謂之汭澤之廣者謂之衍  
廣物第八

藁謂之稗稗謂之芻生曰芻穀謂之粒菜謂之蔬禾穗謂之穎截穎謂之銓拔心曰擣拔根曰擢把謂之秉秉四曰筥筥十曰稷棘之實謂之棗桑之實謂之椹柞之實謂之橡

廣鳥第九

去陰就陽謂之陽鳥鴻鴈是也純黑而反哺者謂之烏小而腹下白反哺者謂之雅烏白項而羣飛者謂之燕烏白脰烏也雅烏鸞也

廣獸第十

豕彘也彘猪也其子曰豚豕之大者謂之豨小者謂之豮鳥之所乳謂之巢鷄雉所乳謂之窠鹿之所息謂之場兔之所息謂之窟魚之所息謂之潛潛慘也積柴水中而魚舍焉

度

跬一舉足也倍跬謂之步四尺謂之仞倍仞謂之尋尋舒兩肱也倍尋謂之常五尺謂之墨倍墨謂之丈倍丈謂之端倍端謂之兩倍兩



謂之疋疋有五謂之束


量

一手之盛謂之溢兩手謂之掬掬一升也掬四謂之豆豆四謂之區區四謂之釜釜二有半謂之藪藪二有半謂之缶二缶謂之鍾二鍾謂之秉秉十六斛也

衡

二十四銖曰兩兩有半曰捷倍捷曰舉倍舉曰鏘鏘謂之鍤二鍤四兩謂之斤斤十謂之衡衡有半謂之秤秤二謂之鈞鈞四謂之石石四謂之鼓然則鼓四百八十斤也

孔叢子卷第三





孔叢子卷第四

公孫龍第十二

公孫龍者平原君之客也好刑名以白馬爲非白馬或謂子高曰此人小辨而毀大道子盍往正諸子高曰大道之悖天下之交往也吾何病焉或曰雖然子爲天下故往也子高適趙與龍會平原君家謂之曰僕居魯遂聞下風而高先生之行也願受業之日久矣然所不取於先生者獨不取先生以白馬爲非白馬爾誠去非白馬之學則穿請爲弟子公孫龍曰先生之言悖也龍之學正以白馬爲非白馬者也今使龍去之則龍無以教矣今龍無以教而乃學於龍不亦悖乎且夫學於龍者以智與學不逮也今教龍去白馬非白馬是失教也失教而後師之不可也先生之所教龍者似齊王之問尹文也齊王曰寡人甚好士而齊國無士尹文曰今有人於此事君則忠事親則孝交友則信處鄉則順有此四行者可謂士乎王曰善是真吾所

謂士者也尹文曰王得此人肯以爲臣乎王曰所願不可得也尹文曰使此人於廣庭大衆之中見侮而不敢鬪王將以爲臣乎王曰夫士也見侮而不敢鬪是辱也寡人不以爲臣矣尹文曰雖見侮而不鬪是未失所以爲士也然而王不以爲臣則鄉所謂士者乃非士乎夫王之令殺人者死傷人者刑民有畏王令故見侮終不敢鬪是全王之法也而王不以爲臣是罰之也且王以不敢鬪爲辱必以敢鬪爲榮是王之所賞吏之所罰也上之所是法之所非也賞罰是非相與曲謬雖十黃帝固所不能治也齊王無以應且白馬非白馬者乃子先君仲尼之所取也龍聞楚王張繫弱之弓載忘歸之矢以射蛟兕於雲夢之囿反而喪其弓左右請求之王曰止也楚人遺弓楚人得之又何求乎仲尼聞之曰楚王仁義而未遂亦曰人得之而已矣何必楚乎若是者仲尼異楚人於所謂人也夫是仲尼之異楚人於所謂人而非龍之異白馬於所謂馬悖也先生好儒術而非仲尼之



所取也欲學而使龍去所以教雖百龍之智固不能當其前也子高莫之應退而告人曰言非而博巧而不理此固吾所不答也異日平原君會衆賓而延子高平原君曰先生聖人之後也不遠千里來顧臨之欲去夫公孫子白馬之學今是非未分而先生翻然欲高逝可乎子高曰理之至精者則自明之豈在穿之退哉平原君曰至精之說可得聞乎答曰其說皆取之經傳不敢以意春秋記六鷁退飛觀之則六察之則鷁鷁猶馬也六猶白也觀之則見其白察之則知其馬色以名別內由外顯謂之白馬名實當矣若以絲麻加之女工爲緇素青黃色名雖殊其質則一是以詩有素絲不曰絲素禮有緇布不曰布緇纁牛玄武此類甚衆先舉其色後名其質萬物之所同聖賢之所常也君子之論貴當物理不貴繁辭若尹文之折齊王之所言與其法錯故也穿之所說於公孫子高其智悅其行也去白馬之說智行固存是則穿未失其所師者也稱此云云沒其理矣是楚王

之言楚人亡弓楚人得之先君夫子探其本意欲以示廣其實狹之故曰不如亦曰人得之而已也是則異楚王之所謂楚非異楚王之所謂人也以此爲喻乃相擊切矣凡言人者總謂人也亦猶言馬者總謂馬也楚自國也白白色也欲廣其人宜在去楚欲正各色不宜去白誠察此理則公孫之辨破矣平原君曰先生之言於理善矣因顧謂衆賓曰公孫子能答此乎燕客史由對曰辭則有焉理則否矣公孫龍又與子高汎論於平原君所辦理至於臧三耳公孫龍言臧之三耳甚辨析子高弗應俄而辭出明日復見平原君曰疇昔公孫之言信辨也先生實以爲何如答曰然幾能臧三耳矣雖然實難僕願得又問於君今爲臧三耳甚難而實非也謂臧兩耳甚易而實是也不知君將從易而是者乎亦其從難而非者乎平原君弗能應明日謂公孫龍曰公無復與孔子高辨事也其人理勝於辭公辭勝於理辭勝於理終必受訛



李寅言曹良於平原君欲仕之平原君以問子高子高曰不識也平原君曰良嘗得見於先生矣故敢問子高曰世人多自稱上用我則國無患夫用智莫若觀其身其身且由不免於患國用之亦惡得無患乎平原君曰良之有患時不明也居家理治可移於官良能殖貨故欲仕之子高曰未可知也今有人於此身脩計明而貧者志不存也身不脩會計闇而富者非盜無所得之也

儒服第十三

子高曳長裾振褰袖方屐麤髮見平原君平原君曰吾子亦儒服乎子高曰此布衣之服非儒服也儒服非一也平原君曰請吾子言之答曰夫儒者居位行道則有衮冕之服統御師旅則有介冑之服從容徒步則有若穿之服故曰非一也平原君曰儒之爲名何取爾子高曰取包衆美兼六藝動靜不失中道耳

子高遊趙平原君客有鄒文季節者與子高相友善及將還魯詣故

人訣既畢文節送行三宿臨別文節流涕交頤子高徒抗手而已分背就路其徒問曰先生與彼二子善彼有戀戀之心未知後會何期悽愴流涕而先生厲聲高揖無乃非親親之謂乎子高曰始吾謂此二子丈夫爾今乃知其婦人也人生則有四方之志豈鹿豕也哉而常聚乎其徒曰若此二子之泣非耶答曰斯二子良人也有不忍之心其於敢斷必不足矣其徒曰凡泣者一無取乎子高曰有二焉大姦之人以泣自信婦人懦夫以泣著愛

平原君與子高飲強子高酒曰昔有遺諺堯舜千鍾孔子百觚子路嗑嗑尚飲十榼古之賢聖無不能飲也吾子何辭焉子高曰以穿所聞賢聖以道德兼人未聞以飲食也平原君曰卽如先生所言則此言何生子高曰生於嗜酒者蓋其勸厲獎戲之辭非實然也平原君欣然曰吾不戲子無所聞此雅言也

平原君謂子高曰吾聞子之先君親見衛夫人南子又云南遊過乎



阿谷而文辭於漂女信有之乎答曰士之相保聞流言而不信者何哉以其所已行之事占之也昔先君在衛衛君問軍旅焉拒而不告色不在己攝駕而去衛君請見猶不能終何夫人之能覲乎古者大饗夫人與焉於時禮儀雖廢猶有行之者意衛君夫人饗夫子則夫子亦弗獲已矣若夫阿谷之言起於近世殆是假其類以行其心者之爲也

子高適魏會秦兵將至信陵君懼造子高之館而問祈勝之禮焉子高曰命勇謀之將以禦敵先使之迎於敵所從來之方爲壇祈克乎五帝衣服隨其方色執事人數從其方之數牲則用其方之牲祝史告于社稷宗廟邦域之內名山大川君親素服誓衆于太廟曰某人之道侵犯大國二三子尚皆同心比力死守將帥稽首再拜受命既誓將帥勒士卒陳于廟之右君立太廟之庭祝史立于社百官各警其事御于君以待命乃大鼓于廟門詔將帥命卒習射三發擊刺三

行告廟用兵于敵也五兵備効乃鼓而出以卽敵此古諸侯應敵之禮也信陵君曰敬受教信陵君問子高曰古者軍旅賞人之必於祖戮人之必於社其義何也答曰賞功於祖告分之均示弗敢專也戮罪於社告中於主示聽之當也

陳廸性多穢訾每得酒食輒先撥捐之然後乃食子高告之曰子無然也似有態者昔君子之於酒食有啐嘗之義無捐放之道假其可食上下何擇假令不潔其下滋甚陳廸曰吾知其無益意欲如此子高曰意不可恣也夫木之性曲者以隱括自直可以人而不如木乎子不見夫雞耶聚穀如陵跑而啄之若縱子之意則與雞豈有異乎陳廸跪曰吾今後知過矣請終改之

子高任司馬又爲將於齊與燕戰而敗齊君曰以子賢明故信子也答曰君知穿孰若周公齊君曰周公聖人而子賢者弗如也子高曰然臣固弗如周公也以臣之知又孰若周公之知其弟齊君曰兄弟



審於他人子高曰君之言是也夫以周公之聖兄弟相知之審而近失於管蔡明人難知也臣與又相見觀其材志察其所履齊國之士弗能過也尙書曰知人則哲惟帝難之穿何慙焉且曹子爲魯三與齊戰三敗失地然後以勇敢之節奮三尺之劍要桓公管仲於盟壇卒收其所喪夫君子之敗如日月之蝕人各有能又庸可棄乎今燕以詐敗破又是又不能於詐也臣之稱又稱其武勇才藝不稱其有詐也又雖敗臣固未失其所稱焉齊君辭屈而不黜司馬又

對魏王第十四

魏王問人主所以爲患子高對曰建大臣而不與謀嬖幸者言用則知士以疎自疑孽臣以遇傲幸者內則射合主心外則談主之非此最人主之大患也

子高謂魏王曰臣入魏國見君之二計臣焉張叔謀有餘范威智不逮然其功一也王曰叔也有餘威也不逮何同乎答曰駑驥同轅伯

樂爲之咨嗟玉石相揉和氏爲之歎息故賢愚共貫則能士匿謀真僞相錯則正士結舌叔雖有餘猶威不逮也

魏王問如何可謂大臣子高答曰大臣則必取衆人之選能犯顏諫爭公正無私者計陳事成主裁其賞事敗臣執其咎主任之而無疑臣當之而弗避君總其美臣行其義然則君不猜於臣臣不隱於君故動無過計舉無敗事是以臣主並各有得也

信陵君問曰古之善爲國至於無訟其道何由答曰由乎政善也上下勤德而無私德無不化俗無不移衆之所譽政之所是也衆之所毀政之所非也毀譽是非與政相應所以無訟也

齊王行車裂之刑羣臣諍之弗聽子高見齊王曰聞君行車裂之刑無道之刑也而君行之臣竊以爲下吏過也王曰寡人爾以民多犯法爲法之輕也子高曰然此誠君之盛意也夫人含五常之性有哀樂喜怒哀樂喜怒無不過其節節過則毀於義民多犯法以法之重



無所措手足也今天下悠悠士亡定處有德則住無德則去欲規霸王之業與諸大國爲難而行酷刑以懼遠近國內之民將畔四方之士不至此乃亡國之道君之下吏不具以聞徒恐逆主意以爲憂不慮不諫之危亡其所矜者小所喪者大故曰下吏之過也臣觀之又非徒不諍而已也心知此事之爲不可將有非議在後則因曰君忿意實然我諫諍必有龍逢比干之禍是爲虛自居於忠正之地而闇推君主使同於桀紂也且夫爲人臣見主非而不諍以陷主於危亡罪之大者也人主疾臣之弼己而惡之資臣以箕子比干之忠惑之大者也齊王曰謹聞命遂除車裂之法焉

子高見齊王齊王問誰可爲臨淄宰稱管穆焉王曰穆容貌陋民不敬也答曰夫見敬在德且臣所稱稱其材也君王聞晏子趙文子乎晏子長不過三尺面狀醜惡齊國上下莫不宗焉趙文子其身如不勝衣其言如不出口非但體陋辭氣又訥訥然其相晉國晉國以寧

諸侯敬服皆有德故也以穆軀形方諸二子猶悉賢之昔臣常行臨  
淄市見屠商焉身脩八尺鬚髯如戟面正紅白市之男女未有敬之  
者無德故也王曰是所謂祖龍始者也誠如先生之言於是乃以管  
穆爲臨淄宰

孔叢子卷第四



孔叢子卷第五

陳士義第十五

魏王遣使者奉黃金束帛聘子順爲相子順謂使者曰若王信能用吾道吾道故爲治世也雖蔬食水飲吾猶爲之若徒欲制服吾身委以重祿吾猶一夫爾則魏王不少於一夫子度魏王之心以告我使者曰魏國狹小乏於聖賢寡君久聞下風願委國先生親受教訓如肯降節豈唯魏國君臣是賴其亦社稷之神祇實永受慶於是乃之魏魏王郊迎謂子順曰寡人不肖嗣先君之業先生聖人之後道德懿邵幸見顧臨願圖國政對曰臣羈旅之臣慕君高義是以戾此君辱貶之而問以政事敢不敬受君之明令

魏王朝羣臣問理國之所先季文對曰唯在知人王未之應子順進曰知人則詰帝堯所病故四凶在朝鯀任無功夫豈樂然哉人難知故也今文之對不稱吾君之所能行而乃欲強吾君以聖人所難此

不可行之說也王曰先生言之對曰當今所急在脩仁尙義崇德敦禮以接鄰國而已昔舜命衆官羣臣競讓得禮之致也苟使朝臣皆有推賢之心主雖不知人則臣位必當若皆以知人爲治則人主宜未過堯且其目所不見者亦必漏矣王曰善

秦王得西戎利刀以之切玉如割水焉以示東方諸侯魏王問子順曰古亦有之乎對曰昔周穆王大征西戎西戎獻鍔之劍火浣之布其劍長尺有咫鍊鋼赤刃用之切玉如切泥焉是則古亦有也王曰火浣之布若何對曰周書火浣布垢必投諸火布則火色垢乃灰色出火振之皜然疑乎雪焉王曰今何以獨無對曰秦貪而多求求欲無厭是故西戎閉而不致此以素防絕之也然則人主貪欲乃異物所以不至不可不慎也

魏王曰吾聞道士登華山則長不死意亦願之對曰古無是道非所願也王曰吾聞之信對曰未審君之所聞親聞之於不死者耶聞之



於傳聞者耶若聞之於傳聞者傳者妄也若聞之於不死者不死者今安在在者君學之勿疑不在者君勿學無疑

李由之母少寡與李音竊相好而生由由有才藝仕於魏魏王甚愛之或曰李由母姦不知其父不足貴也王以告由且曰吾不以此賤子也雖然古之賢聖豈有似子者乎吾將舉以折毀子者李由對曰今人不通於遠在臣欲言誰爾且孔子少孤則亦不知其父者也孔子母死殯於五父之衢人見之皆以爲葬問聊曼父之母得合葬於防此則聖人與臣同者也王笑曰善子順聞之間魏王曰李由安得斯言王曰假以自顯無傷也對曰虛造謗言以誣聖人非無傷也且夫明主之於臣唯德所在不以小疵妨大行也昔鬪子文生於淫女而不害其爲令尹今李由可則寵之何患於人之言而使橫生不然之說若欺有知則有知不受若欺凡人則凡人疑之必亦問臣則臣不爲君之故誣祖以顯由也如此則羣臣更知由惡此惡必聚矣所

謂求自潔而益其垢猶抱石以救溺愈不濟矣

魏王使相國脩好於鄰國遂連和於趙趙王既賓之而燕問子順曰  
今寡人欲來北狄不知其所以然答曰誘之以其所利而與之通市  
則自至矣王曰寡人欲因而弱之若與交市分我國貨散於夷狄是  
強之也可乎答曰夫欲與之市者將以我無用之貨取其有用之物  
是故所以弱之之術也王曰何謂我之無用彼之有用答曰衣服之  
物則有珠玉五采飲食之物則有酒醪五熟此卽我之所有而彼所  
利者也夷狄之貨唯牛馬旃裘弓矢之器是其所饒而輕以與人者  
也以吾所有易彼所饒如斯不已則夷狄之用將糜於衣食矣殆可  
舉槌而驅之豈徒弱之而已乎趙王曰敬受教

枚產謂子順曰臣匱於財聞猗頓善殖貨欲學之先生同國也當知  
其術願以告我答曰然知之猗頓魯之窮士也耕則常飢桑則長寒  
聞陶朱公富往而問術焉朱公告之曰子欲速富當畜五牲於是乃



適西河大畜牛羊于猗氏之南十年之間其滋息不可計貲擬王公馳名天下以興富於猗氏故曰猗頓且夫爲富者非唯一術今子徒問猗頓何也枚產曰亦將問之於先生也答曰吾貧而子問以富術縱有其術是不可用之術也昔人有言能得長生者道士聞而欲學之比往言者死矣道士高蹈而恨夫所欲學學不死也其人已死而猶恨之是知所以爲學也今子欲求殖貨而問術於我我且自貧安能教子以富乎子之此問有似道士之學不死也

東里閭空腹而好自賢欲自親於子順子順弗下顏或曰夫君子之交於世士亦取其一節而已今東閭子疏達亮直大丈夫也求爲先生役而先生無意接之斯者無乃非周公之交人乎子順曰此吾所以行周公之行也夫東閭子外質頑拙有似疏直然內懷容媚諂彪非大丈夫之節也若其度骸稱膚面目鬢眉實美於人聖人論士不以爲貴者無益於德故也然東閭子中不應外侮慢世士卽所謂愚

人而謂人爲愚者也恃其虛狀以不德於人此乃周公之所罪何交之有

宮佗見子順曰佗困於貧賤將欲自託富貴之門庶克免乎子順曰夫富而可以託貧貴而可以寄賤者天下寡矣非信義君子明識窮達則不可今子所欲託者誰也宮佗曰將適趙公子子順曰非其人矣雖好養士自奉而已終弗能稱也宮佗曰將適燕相國子順曰彼徒兄弟甥舅各濟其私無求賢之志不足歸也宮佗曰將適齊田氏子順曰齊大國也其士大夫皆有自多之心不能容子也佗曰然則何嚮而可子順曰吾弗識也宮佗曰唯先生知人願告所擇將往庇焉子順曰濟子之欲則宜若郈成子者昔郈成子自魯聘晉過乎衛右宰穀臣止而觴之陳樂而不作送以寶璧反過而不辭其僕曰日者右宰之觴吾子甚歡也今過而不辭何也成子曰夫止而觴我與我歡也陳樂而不作告我哀也送我以璧寄之我也若由此觀之



衛其有亂乎過衛三十里聞甯喜作難右宰死之還車而臨三舉而歸反命于君乃使人迎其妻子隔宅而居之分祿而食之其子長而反其璧夫子聞之曰智可與徵謀仁可與託孤廉可以寄財者其郈成子之謂乎今子求若人之比庇焉可也宮侗曰循先生之言舍先生將安之請從執事子順辭不得已乃言之魏王而升諸朝

子順相魏改變寵之官以事賢才奪無任之祿以賜有功諸喪職秩者不悅乃造謗言文咨以告且曰夫不害前政而有成孰與變之而起謗哉子順曰民之不可與慮始久矣古之善爲政者其初不能無謗子產相鄭三年而後謗止吾先君之相魯三月而後謗止今吾爲政日新雖不能及聖賢庸知謗止獨無時乎文咨曰子產之謗嘗亦聞之未識先君之謗何也子順曰先君初相魯魯人謗誦曰麇裘而芾投之無戾芾之麇裘投之無郵及三月政成化行民又作誦曰衮衣章甫實獲我所章甫衮衣惠我無私文咨喜曰乃今知先生亦不

異乎聖賢矣

魏王謂子順曰吾欲致天下之士奈何子順對曰昔周穆王問祭公謀父曰吾欲得天下賢才對曰去其帝王之色則幾乎得賢才矣今臣亦請君去其尊貴之色而已王曰吾欲得無欲之士爲臣何如子順曰人之可使以有欲也故欲多者其所得用亦多欲少者其所得用亦少矣夷齊無欲雖文武不能制君安得而臣之

論勢第十六

魏王問相國曰今秦負強以無道陵天下天下莫不患寡人欲割國之半以親諸侯求從事於秦可乎子順對曰以臣觀之殆無益也今天下諸侯畏秦之日久矣數被其毒無欲復之之志心無所計委國於遊說之士遊說之士挾強秦以爲資賣其國以收利義手服從曾不能制如君之謀未獲其利而祇以爲名適足以速秦之首誅則無以得之不如守常以須其變也王曰秦其遂有天下乎對曰必然雖



然取不以義得不以道自古以來未有能終之者

五國約而誅秦子順會之秦未入境而還諸侯留兵於成臯子順謂市丘子曰此師楚爲之主今兵罷而不散殆有異意君其備諸市丘子曰先生幸而教之願以國寄先生子順許諾遂見楚王曰王約五國而西伐秦事旣而不集又久師於市丘謗君者或以君欲攻市丘以償兵費天下之士且以是輕君而重秦且又不義君之爲矣王何不卜交乎楚王曰奈何子順曰王今出令使五國勿攻市丘五國重王則聽王之令矣不重王王且反王之令而攻市丘以此卜五國交王之輕重必明矣楚王敬諾而五國散

趙間魏將以求親於秦子順謂趙王曰此君之下吏計過也比目之魚所以不見得於人者以耦視而俱走也今秦有兼吞天下之志日夜伺間不忘於側息趙魏與之鄰接而強弱不敵秦所以不敢圖并趙魏者徒以二國併自周旋者也今無故自離以資強秦天下拙謀

無過此者故臣曰君之下吏計過也夫連雞不能上棲亦猶二國構難不能自免於秦也願王熟慮之趙王曰敬受教

韓與魏有隙子順謂韓王曰昭釐侯一世之明君也申不害一世之賢相也韓與衛敵侔之國而釐侯執圭見梁君者非好卑而惡尊慮過而計失也與嚴敵爲鄰而動有滅亡之變獨勁不能支二難故降心以相從屈己以求存也申不害慮事而言忠臣也昭釐侯聽而行之明君也今韓弱於始之韓魏弱於始之魏秦強於始之秦而背先人之舊好以區區之衆居二敵之間非良策也齊楚遠而難恃秦魏呼吸而至舍近而求遠是以虛名自累而不免近敵之困者也爲王計者莫如除小忿全大好也吳越之人同舟濟江中流遇風波其相救如左右手者所患同也今不恤所同之患是不如吳越之舟人也

韓王曰善

秦兵攻趙魏大夫以爲於魏便子順曰何謂曰勝趙則吾因而服焉



不勝趙則可乘弊而擊之子順曰不然秦自孝公以來戰未嘗屈今皆良將何弊之乘大夫曰縱其勝趙於我何損鄰之不脩國之福也子順曰秦貪暴之國也勝趙必復他求吾恐於時受其師也先人有言燕雀處屋子母相哺煦焉其相樂也自以爲安矣竈突炎上棟宇將焚燕雀顏色不變不知禍之將及己也今子不悟趙破患將及己可以人而同於燕雀乎

齊攻趙圍廩丘趙使孔青帥五萬擊之剋齊軍獲尸三萬趙王詔勿歸其尸將以困之子順聘趙問王曰不歸尸其困何也曰其父兄子弟悲苦無已廢其產也子順曰非所以窮之也死一也歸尸與不歸悲苦胡異焉以臣愚計貧齊之術乃宜歸尸王曰何謂對曰使其家遠來迎尸不得事農一費也歸所葬使其送死終事二費也一年之中喪卒三萬三費也欲無困貧不能得己王曰善旣而齊大夫聞子順之謀曰君子之謀其利博哉

子順相魏凡九月陳大計輒不用乃喟然曰不見用是吾言之不當也言不當於主而居人之官食人之祿是尸利也尸利素殮吾罪深矣退而以病致事魏王遣使入其館謝曰寡人昧於政事不顯明是非以啓罪於先生今知改矣願先生爲百姓故幸起而教之辭曰臣有犬馬之疾不任國事苟得從四民之列子弟供魏國之征乃君惠也敢辱君命以速刑書人謂子順曰王不用子子其行乎答曰吾將行如之山東則山東之國將并於秦秦爲不義義所不入遂寢于家秦急攻魏魏王恐或謂子順曰如之何答曰吾私有計然豈能賢於執政故無言焉魏王聞之駕如孔氏親問焉曰國亡矣如之何對曰夫棄之不如用之之易也死之不如棄之之易也人能棄之弗能用也能死之不能棄也此人過也今王亡地數百里亡城數十而患不解是王棄之非用之也秦之強天下無敵魏之弱甚矣而王是以質秦此王能死不能棄之也是重過也若能用臣之計則虧地不足傷



國卑體不足苦身患解而怨報矣今秦四境之內執政以下固曰與  
嫪氏乎與呂氏乎雖門閭之下廊廟之上猶皆如是今王誠能割地  
賄秦以爲嫪毒功卑身尊秦以自嫪毒始王又以國贊嫪毒也則嫪  
毒勝矣於是太后之德王也深如骨肉王之交最爲天下之上矣孰  
不棄呂氏而從嫪毒天下皆然則王怨必報矣

### 執節第十七

趙孝成王問曰昔伊尹爲臣而放其君其君不怨何行而得乎此也  
子順答曰伊尹執人臣之節而弼其君以禮亦行此道而已矣王曰  
方以放君爲名而先生稱禮何也子順曰以禮括其君使入於善也  
曰其說可得聞乎答曰其在商書太甲嗣立而于冢宰之政伊尹曰  
惟王舊行不義習與性成予不狎于不順王姑卽桐邇于先王其訓  
罔以後人迷王往居憂允思厥祖之明德是言太甲在喪不明乎人  
子之道而欲知政於是伊尹使之居桐近湯之墓處憂哀之地放之

不得知政三年服竟然後反之卽所以奉禮執節事太甲者也率其君以義強其君以孝道未有行此見怨也王曰善哉我未之聞也

魏安釐王問子順曰馬回之爲人雖少才文梗梗亮直有大丈夫之節吾欲以爲相可乎答曰知臣莫若君何有不可至於亮直之節臣未明也王曰何故答曰聞諸孫卿云其爲人也長目而豕視者必體方而心員每以其法相人千百不失臣見回非不偉其體幹也然甚疑其目王卒用之三月果以詔得罪

新垣固謂子順曰賢者所在必興化致治今子相衛未聞異政而卽自退其有志不得乎何去之速也答曰以無異政所以自退也且死病無良醫今秦有吞食天下之心以義事之固不獲安救亡不暇何化之興昔伊摯在夏呂望在商而二國不理豈伊呂之不欲哉勢不可也當如今日山東之國弊而不振三晉割地以求安二周折節而入秦燕齊宋楚已屈服矣以此觀之不出二十年天下盡爲秦乎



季節見於子順子順賜之酒辭問其故對曰今日家之忌日也故不敢飲子順曰飲也禮雖服衰麻見於君及先生與之梁肉無辭所以敬尊長而不敢遂其私也忌日方於有服則輕矣

魏安釐王問天下之高士子順曰世無其人也抑可以爲次其魯仲連乎王曰魯仲連強作之者非體自然也答曰人皆作之作之不止乃成君子文武欲作堯舜而至焉昔我先君夫子欲作文武而至焉作之不變習與體成則自然矣

虞卿著書名曰春秋魏齊曰子無然也春秋孔聖所以名經也今子之書大抵談說而已亦以爲名何答曰經者取其事常也可常則爲經矣且不爲孔子其無經乎齊問子順子順曰無傷也魯之史記曰春秋經因爲名焉又晏子之書亦曰春秋吾聞泰山之上封禪者七十有二君其見稱述數不盈十所謂貴賤不嫌同名也

邯鄲之民以正月之旦獻雀於趙王而綴之以五綵趙王大悅申叔

以告子順子順曰王何以爲也對曰正旦放之示有生也子順曰此委巷之鄙事爾非先王之法也且又不令申叔曰敢問何謂不令答曰夫雀者取其名焉則宜受之於上不宜取之於下下人非所得制爵也而王悅此殆非吉祥矣昔虢公祈神神賜之土田是失國而更受田之祥也今以一國之王受民之雀將何悅哉

申叔問曰犬馬之名皆因其形色而名焉唯韓盧宋鵲獨否何也子順答曰盧黑色鵲白色非色而何

魏公子無忌死韓君將親吊焉其子榮之以告子順子順曰必辭之禮鄰國君吊君爲之主今君不命子則子無所受韓君也其子辭韓韓君乃止

子高以爲趙平原君霸相之一作霸世之士惜不遇其時也其子子順以爲

衰世之好事公子無霸相之才也申叔問子順曰子之家公有道先生既論之矣今子易之是非焉在答曰言貴盡心亦各其所見也若



是非則明智者裁之

申叔問子順曰禮爲人臣三諫不從可以稱其君之非乎答曰禮所不得也曰叔也昔者逮事有道先生問此義焉而告叔曰得稱其非者所以欲天下人君使不敢遂其非也子順曰然吾亦聞之是亡考起時之言非禮意也禮受放之臣不說久以無罪先君夫子曰事君欲諫不欲陳言不欲顯君之非也申叔曰然則晏子叔向皆非禮也答曰此二大夫相與私燕言及國事未爲非禮也晏子旣陳屨賤而踊貴於君其君爲之省刑然後以及叔向叔向聽晏子之私又承其問所宜亦答以其事也

魏王問子順曰寡人聞昔者上天神異后稷而爲之下嘉穀周以遂興往者中山之地無故有穀非人所爲云天雨之反亡國何故也答曰天雖至神自古及今未聞下穀與人也詩美后稷能大教民種嘉穀以利天下故詩曰誕降嘉種猶書所謂稷降播種農植嘉穀皆說

種之其義一也若中山之穀妖怪之事非所謂天祥也

趙王問相於平原君平原君曰鄒文可王曰其行如何對曰夫孔子高天下之高士也取友以行交遊以道文與之遊稱曰好義王其用之王卒不用後以平原君言問子順且曰先生知之乎答曰先父之所交也何敢不知王曰寡人雖失之在前猶願聞其行於先生也答曰行不苟合雖賤不渝君子人也王遂禮之固以老辭

趙王謂子順曰寡人聞孔氏之世自正考甫以來儒林相繼仲尼重之以大聖自茲以降世業不替天下諸侯咸賓禮焉先生承緒作二國師從古及今載德流聲未有若先生之家者也先生之嗣率由前訓將與天地相敵矣答曰若先祖父並稟聖人之性如君王之言也至如臣者學行不敏寄食於趙祿仕於魏幸遇二國之君寬以容之若乃師也未敢承命假令賴君之福願後世克祚不忝前人不泯祖業豈徒一家之賜哉亦天下之慶也王曰必然必然



孔叢子卷第五

孔叢子卷五

十一中華書局聚

珍傲宋版印

小戴子卷五十五





孔叢子卷第六

詰墨第十八

墨子稱景公問晏子以孔子而不對又問三皆不對公曰以孔子語寡人者衆矣俱以爲賢聖也今問於子而不對何也晏子曰嬰聞孔子之荆知白公謀而奉之以石乞勸下亂上教臣弑君非聖賢之行也詰之曰楚昭王之世夫子應聘如荆不用而反周旋乎陳宋齊衛楚昭王卒惠王立十年令尹子西乃召王孫勝以爲白公是時魯哀公十五年也夫子自衛反魯居五年矣白公立一年然後乃謀作亂亂作在哀公十六年秋也夫子已卒十旬矣墨子雖欲謗毀聖人虛造妄言奈此年世不相值何

墨子曰孔子之齊見景公公悅之封之以尼谿晏子曰不可夫儒倨法而自順立命而怠事崇喪遂哀盛用繁禮其道不可以治國其學不可以導家公曰善詰之曰卽如此言晏子爲非儒惡禮不欲崇喪

遂哀也察傳記晏子之所行未有以異於儒焉又景公問所以爲政  
晏子答以禮云景公曰禮其可以治乎晏子曰禮於政與天地並此  
則未有以惡於禮也晏桓子卒晏嬰斬衰枕草苴經帶杖菅菲食粥  
居于倚廬遂哀三年此又未以異於儒也若能以口非之而躬行之  
晏子所弗爲

墨子曰孔子怒景公之不封己乃樹鴟夷子皮於田常之門詰之曰  
夫樹人爲其信己也記曰孔子適齊惡陳常而終不見常病之亦惡  
孔子交相惡而又往仕其不然矣記又曰陳常弑其君孔子齊戒沐  
浴而執請討之觀其終不樹子皮審矣

墨子曰孔子爲魯司寇舍公家而奉季孫詰之曰若以季孫爲相司  
寇統焉奉之自法也若附意季孫季孫旣離公室則孔子合之季孫  
旣受女樂則孔子去之季孫欲殺囚則孔子赦之非苟順之謂也  
墨子曰孔子厄於陳蔡之間子路烹豚孔子不問肉之所由來而食



之剝人之衣以沽酒孔子不問酒之所由來而飲之詰之曰所謂厄者沽買無處藜藿不粒乏食七日若烹豚飲酒則何言乎厄斯不然矣且子路爲人勇於見義縱有豚酒不以義不取之可知也又何問焉

墨子曰孔子諸弟子子貢季路輔孔悝以亂衛陽虎亂魯佛肸以中牟畔漆雕開形殘詰之曰如此言衛之亂子貢季路爲之耶斯不待言而了矣陽虎欲見孔子孔子不見何弟子之有佛肸以中牟畔召孔子則有之矣爲孔子弟子未之聞也且漆雕開形殘非行己之致何傷於德哉

墨子曰孔子相魯齊景公患之謂晏子曰隣有聖人國之憂也今孔子相魯爲之若何晏子對曰君其勿憂彼魯君弱主也孔子聖相也不如陰重孔子欲以相齊則必強諫魯君魯君不聽將適齊君勿受則孔子困矣詰之曰案如此辭則景公晏子畏孔子之聖也而上云

非聖賢之行上下相反若晏子悖可也否則不然矣

墨子曰孔子見景公公曰先生素不見晏子乎對曰晏子事二君而得順焉是爲三心所以不見也公告晏子晏子曰三君皆欲其國安是以嬰得順也聞君子獨立不慚於影今孔子伐樹削迹不自以爲辱身窮陳蔡不自以爲約始吾望儒貴之今則疑之詰之曰若是乎孔子晏子交相毀也小人有之君子則否孔子曰靈公汙而晏子事之以潔莊公怯而晏子事之以勇景公侈而晏子事之以儉晏子君子也梁丘據問晏子曰事三君而不同心而俱順焉仁人固多心乎晏子曰一心可以事百君百心不可以事一君故三君之心非一也而嬰之心非三也孔子聞之曰小子記之晏子以一心事三君君子也如此則孔子譽晏子非所謂毀而不見也景公問晏子曰若人之衆則有孔子賢乎對曰孔子者君子行有節者也晏子又曰盈成匡父之孝子兄之悌弟也其父尙爲孔子門人門人且以爲貴則其師



亦不賤矣是則晏子亦譽孔子可知也夫德之不脩己之罪也不幸而屈於人己之命也伐樹削迹絕糧七日何約乎哉若晏子以此而疑儒則晏子亦不足賢矣

墨子曰景公登路寢聞哭聲問梁丘據對曰魯孔子之徒也其母死服喪三年哭泣甚哀公曰豈不可哉晏子曰古者聖人非不能也而不爲者知其無補於死者而深害生事故也詰之曰墨子欲以親死不服三日哭而已於意安者卒自行之空用晏子爲引而同于己適證其非耳且晏子服父以禮則無緣非行禮者也

曹明問子魚曰觀子詰墨者之辭事義相反墨者妄矣假使墨者復起對之乎答曰苟得其禮雖百墨吾亦明白焉失其正雖一人猶不能當前也墨子之所引者矯稱晏子晏子之善吾先君吾先君之善晏子其事庸盡乎曹明曰可得聞諸子魚曰昔齊景公問晏子曰吾欲善治可以霸諸侯乎對曰官未具也臣亟以聞而君未肯然也臣

聞孔子聖人然猶居處勸惰廉隅不脩則原憲季羔侍血氣不休志意不通則仲由卜商侍德不盛行不勤則顏閔冉雍侍今君之朝臣萬人立車千乘不善之政加於下民者衆矣未能以聞者臣故曰官未備也此又晏子之善孔子者也曰晏平仲善與人交久而敬之此又孔子之貴晏子者也曹明曰吾始謂墨子可疑今則決不妄疑矣

獨治第十九

子魚生於戰國之世長於兵戎之間然獨樂先王之道講習不倦季則謂子魚曰大丈夫不生則已生則有云爲於世者也今先生淡泊世務脩無用之業當身不蒙其榮百姓不獲其利竊爲先生不取也子魚曰不如子之言也武者可以進取文者可與守成今天下將擾擾焉終必有所定子脩武以助之取吾脩文以助之守不亦可乎且吾不才無軍旅之任徒能保其祖業優遊以卒歲者也

秦始皇東并子魚謂其徒叔孫通曰子之學可矣盍仕乎對曰臣所



學於先生者不用於今不可仕也子魚曰子之材能見時變今爲不用之學殆非子情也叔孫通遂辭去以法仕秦

尹曾謂子魚曰子之誦讀先王之書將奚以爲答曰爲治也世治則助之行道世亂則獨治其身治之至也

陳餘謂子魚曰秦將滅先王之籍而子爲書籍之主其危矣子魚曰吾不爲有用之學知吾者惟友秦非吾友吾何危哉然顧有可懼者必或求天下之書焚之書不出則有禍吾將先藏之以待其求求至無患矣

子魚居衛與張耳陳餘相善耳餘魏之名士也秦滅魏求耳餘懼走會陳勝吳廣起兵於陳欲以誅秦餘謂陳王曰今必欲定天下取王侯者其道莫若師賢而友智孔子之孫今在魏居亂世能正其行修其祖業不爲時變其父相魏以聖道輔戰國見利不易操名稱諸侯世有家法其人通材足以幹天下博智足以慮未形必宗此人天下

無敵矣陳王大悅遣使者齎千金加束帛以車三乘聘焉耳餘又使謂子魚曰天下之事已可見矣今陳王興義兵討不義子宜速來以集其事王又聞子賢欲諮良謀虛意相望也子魚遂往陳王郊迎而執其手議世務子魚以霸王之業勸之王悅其言遂尊以博士爲太師諮度焉

子魚名鮒甲陳人或謂之子鮒或稱孔甲陳勝旣立爲王其妻之父兄往焉勝以衆賓待之長揖不拜無加其禮其妻之父怒曰怙亂僭號而傲長者不能久矣不辭而去陳王跪謝遂不爲顧王心慙焉遂適博士太師之館而言曰予雖丈夫哉然塞於禮義以啓於姻婭唯先生幸訓誨之使免於戾乎子魚曰王所問者善也敢固無辭而對乎今以禮言耶則禮無不拜且宗族婚媾又與衆賓異敬者也敬而加親自古以然也王曰雖已失之於前庶欲收之於後也願先生脩明其事必奉遵焉對曰昔唐堯內親九族外協萬邦禮以婚爲昆弟



妻之父母爲外舅姑由是明之則拜之可知夫婚親之義非宗賢之類也雖自己臣莫敢不敬昔魏信陵君嘗以此質臣之父臣之父曰於諸母之昆弟妻之諸父則以親配德年齊以上雖拜之可也幼於己者揖之可也此出於人情而可常者也王曰善哉請問同姓而服不及者其制何邪對曰先王制禮雖國君有合族之道宗人掌其列繼之以姓而無別醜之以食而無殊各隨本屬之隆殺屬近則死爲之兌屬遠則吊之而已禮之正也是故臣之家哭孔氏之別姓於弗父之廟哭孔氏則於夫子之廟此有據而然也周之道雖百世婚姻不通重先世之同體也王跪曰先生之言厥義博哉寡人雖固敢不盡心

問軍禮第二十

陳王問太師曰行軍之禮可得備聞乎答曰天下有道禮樂征伐自天子出自天子出必以歲之孟秋賞軍師武人于朝簡練俊傑任用

有功命將選士以誅不義於是孟冬以級授軍司徒櫓朴北面而誓之誓于社以習其事先期五日太師筮於祖廟擇吉日齋戒告于郊社稷宗廟既筮則獻兆於天子天子使有司以特牲告社告以所征之事而受命焉舍奠于帝學以受成然後乃類上帝柴于郊以出以齊車遷廟之主及社主行大司馬職奉之無遷廟主則以幣帛皮圭告于祖禰謂之主命亦載齊車凡行主皮圭幣帛皆每舍奠焉而後就館主車止於中門之外外門之內廟主居于道左社主居于道右其所經名山大川皆祭告焉及敵所將戰太史卜戰日卜右御先期三日有司明以敵人罪狀告之史史定誓命戰日將帥陳列車甲卒伍于軍門之前有司讀誥誓使周定三令五申既畢遂禱戰祈克于上帝然後卽敵將士戰全己克敵史擇吉日復禱於所征之地柴于社帝祭社奠祖以告克者不頓兵傷士也戰不克則不告也凡類禩皆用甲丙戊庚壬之剛日有司簡功行賞不稽于時其用命者則加



爵受賜于祖奠之前其奔北犯令者則加刑罰戮于社主之前然後鳴金振旅有司徧告捷于時所有事之山川既至舍于國外三日齋以特牛親格于祖禰然後入設奠以反主若主命則卒奠歛玉埋之于廟兩階間反社主如初迎之禮舍奠于帝學以訊馘告大享于羣吏用備樂饗有功於祖廟舍爵策勳焉謂之飲至天子親征之禮也陳王曰其命將出征則如之何太師曰古者大將受命而出則忘其國卽戎帥陣則忘其家故天子命將出征親潔盛服設奠于祖以詔之大將先入軍吏畢從皆北面再拜稽首而受天子當階南面命授之節鉞大將受天子乃東面西向而揖之示弗御也然後告大社冢宰執蜃宜於社之右南面授大將大將北面稽首再拜而受之承所頒賜于軍吏其出不類其克不禡戰之所在有大山川則祈焉禱克于五帝捷則報之振旅復命簡異功勤親告廟告社而後適朝禮也王曰將居軍中之禮勝敗之變則如之何太師曰將帥尙左士卒尙

右出國先鋒入國後刃介冑在身執銳在列雖君王不拜若不幸軍敗則駟騎赴告于天子載纛謁天子素服哭于庫門之外三日大夫素服哭于社亦如之亡將失城則皆哭七日天子使使迎于軍命將帥無請命然後將帥結草自縛袒右肩而入蓋喪禮也王曰行古禮如何太師曰古之禮固爲於今也有其人行其禮則可無其人行其禮則民弗與也

答問第二十一

陳人有武臣謂子鮒曰夫聖人者誠高材美稱也吾謂聖人之智必見未形之前功垂於身歿之後立教而戾夫弗犯吐言而辯事不破也子之先君可謂當之矣然韓子立法其所以異夫子之論者紛如也子每探其意而校其事持久歷遠遏姦勤善韓氏未必非孔氏未必得也吾今而後乃知聖人無世不有爾前聖後聖法制固不一也若韓非者亦當世之聖人也子以爲奚若子鮒曰子信之爲然是故



未免凡俗也今世人有言高者必以極天爲稱言下者必以深淵爲名是資世之談而無其實者也好事而穿鑿者必言經以自輔援聖以自賢欲以取信於羣愚而度其說也若諸子之書其義皆然吾先君之所自志也請略說一隅而吾子審其信否焉武臣曰諾子鮒曰乃者趙韓魏共并知氏趙襄子之行賞先加具臣而後有功韓非書云夫子善之引以張本然難之豈有不似哉然實非也何以明其然昔我先君以春秋哀公十六年四月己丑卒至二十七年荀瑤與韓趙魏伐鄭遇陳坦而還是時夫子卒已十一年矣而晉四卿皆在也後悼公十四年知氏乃亡此先後甚遠而韓非公稱之曾無忤意則世多好事之徒皆非之罪也故吾以是默口於小道塞耳於諸子久矣而子立尺表以度天直寸指以測淵豫大道而不悟信誣說以疑聖殆非所望也武臣义手跪謝施施而退遂告人曰吾自以爲學之博矣而屈於孔氏方知學不在多要在精之也

陳王問太師曰寡人不得爲諸侯羣賢所推而得南面稱孤其幸多矣今既賴二三君子且又欲規久長之圖何施而可答曰信王之言萬世之福也敢稱古以對昔周代殷乃興滅繼絕以爲政首今誠法之則六國之不携抑久長之本王曰周存二代又有三恪其事云何答曰封夏殷之後以爲二代紹虞帝之胤備爲三恪恪敬也禮之如賓客也非謂特有二代別有三恪也凡所以立二代者備王道通三統也王曰三統者何答曰各自用其正朔二代與周是謂三統王曰六國之後君吾不能封也遠世之王於我何有吾亦自有不及於周又安能純法之乎

陳王涉讀國語言申生事顧博士曰始余信聖賢之道乃今知其不誠也先生以爲何如答曰王何謂哉王曰晉獻惑亂聽讒而書又載驪姬夜泣公而以信入其言之夫婦夜處幽室之中莫能知其私焉雖黔首猶然况國君乎予以是其不信乃好事者爲之辭將欲



成其說以誣愚俗也故使子并疑於聖人也博士曰不然也古者人君外朝則有國史內朝則有女史舉則左史書之言則右史書之以無諱示後世善以爲式惡以爲戒廢而不記史失其官故凡若晉侯驪姬牀第之私房中之事不得掩焉若夫設教之言驅羣俗使人入道而不知其所以者也今此皆書實事累累若貫珠可無疑矣王曰先生真聖人之後也今幸得聞命寡人無過焉

陳王涉使周章爲將西入關將以入秦秦使將章邯距之陳王以秦國之亂也有輕之之意勢若有餘而不設敵備博士太師諫曰章邯秦之名將周章非其敵也今王使章濡然自得而不設備臣竊惑焉夫雖天之所命其禍福吉凶大者在天小者由人今王不修人利以應天祥若跌而不振悔之無及也王曰寡人之軍先生無累也請先生息慮也又諫曰臣聞兵法無恃敵之不我攻恃吾之不可攻也今恃敵而不自恃非良計也王曰先生所言計策深妙予不識也先生

休矣已而告人曰儒者可與守成難與進取信哉博士他日復諫曰臣聞國大兵衆無備難恃一人善射百夫決拾章邯裒將卒皆死士也周章弱懦使彼席卷來前莫有當其鋒者王曰先生所稱寡人昧昧焉願以人間近事喻之答曰流俗之士臣所不忍也今王命之敢不盡情願王察之也臣昔在梁梁人有陽由者其力扛鼎伎巧過人骨騰肉飛手搏躡獸國人懼之然無治室之訓禮教不立妻不畏憚浸相媠瀆方乃積怒妻坐於牀答焉由乃左手建杖右手制其頭妻亦奮恚因受以背使杖擊之而自撮其陰由乃仆地氣絕而不能興鄰人聞其凶凶也窺而見之趣而救之妻愈齷忿莫肯舍旃或發其裳然後乃放夫以無敵之伎力而劣於女子之手者何以輕之無備故也今王與秦角強弱非若由之夫妻也而輕秦過甚臣是以懼故區區之心欲王備慮之也王曰譬類誠佳然實不同也弗聽周章果敗而無後救邯遂進兵擊陳王師大敗



博士凡仕六旬老於陳將設戒其弟襄曰魯天下有仁義之國也戰國之時講誦不衰且先君之廟在焉吾謂叔孫通處濁世而清其身學儒術而知權變是今師也宗於有道必有令圖歸必事焉

孔叢子卷第六





孔叢子卷第七

連叢子上第二十二

敘書

家之族胤一世相承以至九世相魏居大梁

孔子生鯉字伯魚鯉生

上白生求字子家求生箕字子京箕生穿字子高穿

始有二子焉長

子之後承殷統爲宋公中子之後奉夫子祀爲褒成侯小子之後彥以將士高祖有功封蓼侯其子臧嗣焉歷位九卿遷御史大夫辭曰臣世以經學爲業家傳相承作爲訓法然今俗儒繁說遠本雜以妖妄難可以教侍中安國受詔綴集古義臣乞爲太常典臣家業與安國紀綱古訓使永垂來嗣孝武皇帝重違其意遂拜太常其禮賜如三公在官數年著書十篇而卒先時嘗爲賦二十四篇四篇別不在集以其幼時之作也又爲書與從弟及戒子皆有義故列之于左

諫格虎賦

帝使亡諸大夫問乎下國下國之君方帥將士於中原車騎駢闐被行罔戀手格猛虎生縛猛狂味爽而出見星而還國政不恤惟此爲歡乃誇於大夫曰下國鄙固不知帝者之事敢問天子之格虎豈有異術哉大夫未之應因又言曰下國褊陋莫以虞心故乃闢四封以爲藪圍境內以爲林禽鳥育之驛驛淫淫晝則鳴嚙夜則嗥吟飛禽起而日翳獸動而雷音犯之者其罪死驚之者其刑深虞候苑令是掌厥禁於是分幕將士營遮榛叢戴星入野列火求蹤見虞自自乃往尋從張置網羅刃鋒驅檻車聽鼓鍾猛虎顛遽奔走西東悒駭內懷迷冒怔忡耳目喪精值網而衝局然自縛以絲組斬其爪牙支輪登較高載歸家孟賁被髮噴目蹂躪紛華都邑百姓莫不于邁陳列路隅咸稱萬歲斯亦畋獵之至樂也大夫曰順君之心樂矣然非樂之至也樂至者與百姓同之之謂也夫兕虎之生與天地偕山林澤藪又其宅也被有德之君則不爲害今君荒於遊獵莫恤國政驅民



入山林格虎於其廷妨害農業殘天民命國政其必亂民命其必散  
國亂民散君誰與處以此爲至樂所未聞也於是下國之君乃頓首  
曰臣實不敏習之日久矣幸今承誨請遂改之

楊柳賦

嗟茲楊柳先生後傷蔚茂炎夏多陰可涼伐之原野樹之中塘漑浸  
以時日引月長巨本洪枝條脩遠楊天繞連枝猗那其旁或拳句以  
逮下土或擢跡而接穹蒼綠葉累疊鬱茂翳沈蒙籠交錯應風悲吟  
鳴鵠集聚百變其音爾乃觀其四布運其所臨南垂大陽北被宏陰  
西奄梓園東覆果林規方冒乎半頃清室莫與比深於是朋友同好  
几筵列行論道飲燕流川浮觴殽核紛雜賦詩斷章各陳厥志考以  
先王賞恭罰慢事有紀綱洗觶酌樽兕觥並揚飲不至醉樂不及荒  
威儀抑抑動合典章退坐分別其樂難忘惟萬物之自然固神妙之  
不如意此楊樹依我以生未經一紀我賴以寧暑不御簞淒而涼清

內蔭我宗外及有生物有可貴云何不銘乃作斯賦以敘厥情

鶚賦

季夏庚子思道靜居爰有飛鶚集我屋隅異物之來吉凶之符觀之  
歡然覽考經書在德爲祥棄常爲妖尋氣而應天道不渝昔在賈生  
有識之士忌茲服鳥卒用喪已咨我令考信道秉真變怪生家謂之  
天神脩德滅邪化及其鄰禍福無門唯人所求聽天任命慎厥所脩  
栖遲養志老氏之疇祿爵之來祗增我憂時去不索時來不逆庶幾  
中庸仁義之宅何思何慮自今勤劇

蓼蟲賦

季夏既望暑往涼還逍遙諷誦遂歷東園周旋覽觀憩乎南藩覩茲  
茂蓼結葩吐榮猗那隨風綠葉紫莖爰有蠕蟲厥狀似螟羣聚其間  
食之以生於是悟物託事推況乎人幼長斯蓼莫或知辛膏粱之子  
豈曰不人惟非德義不以爲家安逸無心如禽獸何逸必致驕驕必



致亡匪唯辛苦乃丁大殃

與從弟書

臧報侍中相如深忿俗儒淫辭冒義有意欲撥亂反正由來久矣然雅達博通不世而出流學守株比肩皆是衆口非非正將焉立每獨念至此夙夜反側誠懼仁弟道未信於世而以獨知爲愆也人之所欲天必從之舊章潛於壁室正於紛擾之際歟爾而見俗儒結舌古訓復申豈非聖祖之靈欲令仁弟讚明其道以闡其業者哉且曩雖爲今學亦多所不信唯聞尚書二十八篇取象二十八宿謂爲至然也何圖古文乃自百篇邪如堯典說者以爲堯舜同道弟常以爲雜有堯典今果如所論及成王遇風雷周公見任俗儒羣驅狗吠雷同不得其髣髴惡能明聖道之真乎知以今讐古以隸篆推科斗已定五十餘篇並爲之傳云其餘錯亂文字摩滅不可分了欲垂待後賢誠合先君闕疑之義顧惟世移名制變改文體義類轉益難知以弟

博洽溫敏既善推理又習其書而猶尙絕意莫肯垂留三思縱使來世亦有篤古碩儒其若斯何嗚呼惜哉先王遺典闕而不補聖祖之業分半而泯後之君子將焉取法假令顏閔不歿游夏更生其豈然乎其豈然乎不能已已貴復申之

衆口非非一作衆非非正

### 與子琳書

告琳頃來聞汝與諸友生講肄書傳滋滋晝夜衍衍不怠善矣人之進道唯問其志取必以漸勤則得多山霽至柔石爲之穿蝸蟲至弱木爲之弊夫霽非石之鑿蝸非木之鑿然而能以微脆之形陷堅剛之體豈非積漸之致乎訓曰徒學知之未可多履而行之乃足佳故學者所以飾百行也侍中子國明達淵博雅好絕倫言不及利行不欺名動遵禮法少小及長操行如故雖與羣臣並居近侍頗見崇禮不供褻事獨得掌御唾壺朝廷之士莫不榮之此汝親所見也詩不云乎無念爾祖聿脩厥德又曰操斧伐柯其則不遠遠則尼父近則



子國於以立身其庶矣乎

敘世

臧子琳位至諸吏亦傳學問琳子黃厥德不脩失侯爵大司徒光以其祖有功德而邑士廢絕分所食邑三百戶封黃弟茂爲關內侯茂子子國生子卬爲諸生特善詩禮而傳之子卬生仲驩爲博士弘農守善春秋三傳公羊穀梁訓諸生仲驩生子立善詩書少游京師與劉歆友善嘗以清論譏貶史丹史丹諸子並用事爲是不仕以詩書教於闕里數百人子立生子元以郎校書時歆大用事而子元校書七年官不益故或譏以爲不恤於進取唯楊子雲善之子元生子建與崔義幼相善長相親也義仕王莽爲建新大尹數以世利勸子建仕子建答曰吾有布衣之心子有袞冕之志各從所好不亦善乎且習與子幼同志故相友也今子以富貴爲榮而吾以貧賤爲樂志已乖矣乖而相友非中情也請與子辭遂歸鄉里光武中興天下未悉

從化董憲彭豐等部衆暴於鄒魯之間郡守上黨鮑府君長患之是時闕里無故荆棘叢生一旦自闢廣千數百步從舊講堂坦然彥曰人之性分氣度不同有體貌亢疏色厲矜莊儀容冰栗似若能斷而當事少決不遂其爲者或性玄靜不與俗競氣不勝辭似若無能而涉事不顧臨危不撓者是爲似若強焉而不能勝量似若弱焉而不可奪也君子觀之以表推內察容而度心所以得之也若是似類相亂如何取實乎子豐曰夫人者患在不察也人之所綜物方志也慮協於理固以守之此之謂強知足以通變明足以破僞情足以審疑果足以必志固足以先事而功成矣卽所謂寬柔內思不報無道之強也豈待形氣之助乎若乃貌肅內荏高氣亢戾多意倨跡理不充分業不一定執志不果此謂剛復非強者也是故君子欲必其行而違其貌由是論之強弱之分不取於氣色明矣必也察志在觀其履事乎非定計於內而敏發於外孰能稱此強名乎哉子豐曰夫物有



定名而論有一至是故有可一言而得其難極雖千言之不能奪者  
唯析理卽實爲得不以濫麗說辭爲賢也然而世俗人聰達者寡隨  
聲者衆持論無主俯仰爲資因貴勢而附從託浮說以爲定不求之  
於本不考之於理故長溷殺言而衆莫能折其中所以爲口費而無  
得也夫論辨者貴其能別是非之理非巧說之謂也掌事要者納言  
而得理此乃辨也聽者猶弗之察辭氣支離取喻多端弗較以類理  
不應實而聽者因形飾僞從讚然之是所謂以巧辭多喻爲辨而莫  
識一言而別實者也人皆欲割析分理揆是真僞固不知所以精之  
如自得其爲謬惑莫之甚焉是故舉多敗事而寡特之智困於羣醜  
也夫聰者不可惑以淫聲明者不可眩以邪色故有氣色勢者佑德  
之半無此二者損德之半

敘作左氏傳義詰者曰先生名奇字子異其先魯人卽褒成君次儒  
第二子之後也家于茂陵以世學之門未嘗就遠方異師也唯兄君

魚少從劉子駿受春秋左氏傳於講業最名爲精究其義子駿曰自  
以才學弗若也其或訪經傳於子駿輒曰幸問孔君魚吾已還從之  
資道矣由是大以春秋見稱當世王莽之末君魚避地至大河之西  
以大將軍竇融爲家常爲上賓從容以論道爲事是時先生年二十  
一矣每與其兄議學其兄謝服焉及世祖卽祚君魚乃仕官至武都  
太守關內侯以清儉聞海內先生雅好儒術淡忽榮祿不願從政遂  
刪撮左氏傳之難者集爲義詰發伏闡幽讚明聖祖之道以祛後學  
著書未畢而早世不永宗人子通痛其不遂惜茲大訓不行于世乃  
校其篇目各如本第并序答問凡三十一卷將來君子儻肯遊意幸  
詳錄之焉子豐善於經學不好諸家書鮑彥與子豐名齊而業殊故  
謂子豐曰諸家書多才辭莫過淮南也讀之令人斷氣方自知爲陋  
爾子豐曰試說其最工不可及者彥曰君子有酒小人鼓缶雖不可  
好亦不可醜此語何如子豐曰不急爾彥曰且効作此語子豐曰君



子樂醺小人擊抃雖不足貴亦不可賤君子舞象小人擊壤上化使然又何足賞吾能作數十曲且無益於世故不爲爾鮑子於是屈而無辭

連叢子下第二十三

元和二年三月孝章皇帝東巡過魯幸闕里以大牢祠聖師作六代之樂天子升廟西面羣臣在庭北面皆再拜天子進爵而後坐乃召諸孔丈夫年二十以上者六十三人臨賜酒飯子和自陳曰臣草莽所蔽才非幹時行非絕倫託備先聖遺嗣世名學家陛下誤加拔擢微臣蘭臺令史會值車駕東巡先禮聖師猥以餘福惠及臣宗誠非碎首所能報謝詔曰治何經對曰爲詩書頗涉禮傳詔曰今日之會寧於卿宗有光榮乎對曰非所敢當也臣聞明王聖主莫不尊師而貴道今陛下尊臣祖之靈貴臣祖之道親屈萬乘辱臨弊里此乃陛下所以崇聖也若夫顧其遺嗣得與羣臣同受釐福此乃陛下愛屋

及烏惠下之道所以崇德作聖臣宗弗與於光榮非所敢承天子嘆曰非聖者子孫惡有斯言遂拜子和郎中詔隨車駕賜孔氏男女錢帛子和從還京師遂校書東觀其年十二月爲臨晉令其友崔駟以其家卦林占之謂爲不吉語子和曰盍辭乎駟曰學不爲人仕不擇官所以爲吉也且卜以決疑不疑何卜吉凶由人而由卦林乎徑往之官三年秋八月天子巡后土登龍門子和自請從行在所天子識其狀貌燕見移時賜帛十端而還九月旣望寢疾浸不瘳乃命其二子留葬焉二子長曰長彥年十有二次曰季彥年十歲父之友西洛人姚進先有道徵不就養志于家長彥季彥常受教焉旣除喪則苦身勞力以自衣食家有先人遺書兄弟相勉諷誦不倦于時蒲阪令汝南許君然造其宅勸使歸魯奉以車二乘辭曰載柩而返則遺父違命舍墓而去則心所不忍君然曰以孫就祖於禮爲得願子無疑答曰若以死有知也祖猶鄰宗族焉父獨留此不以極乎吾其定矣



遂還其車於是甘貧味道研精墳典十餘年間會徒數百故時人爲之語曰魯國孔氏好讀經兄弟誦誦皆可聽學士來者有聲名不過孔氏那得成長彥頗隨時爲今學季彥壹其家業兼脩史漢不好諸家之書

華陰張太常問如何斯可謂備德君子季彥答曰性能沈邃則不可測志不在小則不可度砥厲廉隅則不可越行高體卑則不可階興事効業與言俱立捨己從善不恥服人交友以義不慕勢利並立相下不倡游言若此可謂備德矣張生曰不有孝弟忠信乎答曰別而論之則應此條惣而目之則曰孝弟忠信張生聞是言喜而書之

魯人有同歲上計而死者欲爲之服問於季彥季彥曰有恩好者其總乎昔諸侯大夫共會事于王及以君命同盟霸主其死則皆有哭臨之禮今之上計並覲天子有交燕之歡同名締素上紀先君下錄子弟相敦以好相厲以義又數相往來特有私親雖比之朋友不亦

可乎

崔駟學於大學而糧乏鄧衛尉欲餼焉而未果季彥年九歲以其父命往見衛尉曰夫言不在多在於當理施不在豐期於救乏崔生臣父之執也不幸而貧公許賑之言既當理矣從來有曰嘉貺未至或欲豐之然後乃致乎荅曰家物少須租入當猥送之季彥曰公顧盼崔生欲分祿以周其無君之惠也必欲待君租入然後猥致則於崔生爲羸受人以自羸非義崔生所不爲也且今已乏矣而方須租入是猶古人欲決江海以救牛蹄之魚之類也鄧公曰諾

梁人取後妻後妻殺夫其子又殺之季彥返魯過梁梁相曰此子當以大逆論禮繼母如母是殺母也季彥曰言如母則與親母不等欲以義督之也昔文姜與殺魯桓春秋去其姜氏傳曰不稱姜氏絕不爲親禮也絕不爲親卽凡人爾且夫手殺重於知情知情猶不得爲親則此下手之時母名絕矣方知古義是子宜以非司寇而擅殺當



之不得爲殺母而論以逆也梁相從之

弘農太守皇甫威明問仲淵曰吾聞孔氏自三父之後能傳祖之業者常在於叔祖今觀連叢所記信如所聞然則伯季之後弗克負荷矣答曰不然也先君所以爲業者非唯經傳而已可以學則學可以進則進可以止則止故曰無可無不可也蓋唯執行中庸期於得道非末嗣子孫所能及也是以先父各取所能能仕則仕能學則學自伯祖之子孫世仕有位季祖之子孫或學或仕或文或武所統不壹故學不稽古仕無高官文非俎豆武非戢兵不專故也皇甫曰如高明之言是故弗克負荷已答曰伯之子孫今何其仕季之子孫何所任所以世得聞焉且人之才性受天有分若如君之論則成王伯禽雖致泰平皆當以不聖蒙弗克負荷之罪乎皇甫笑曰善旣而或謂仲淵曰以古人推之自可如皇甫之言爾而子矜之何也皇甫雖口與子心實不與也答曰吾其然然此君來言頗欲相侵故激至於此

豈曰得道由不獲已也

長孫尚書問季彥曰處士聖人之後也豈知聖人之德惡乎齊答曰德行邈於世智達秀於人幾於如此矣曰聖人者必能聞於無聲見於無形然後稱聖爾如處士所言大賢則能爲之季彥曰君之論宜若未之近也夫有聲故可得而聽有形故可得而見若乃無聲雖師曠側耳將何聞乎無形雖離婁並照將何覩乎書曰惟狂克念作聖狂人思念道德猶爲聖人聖人大賢之清者也賢人中之清者也孔大夫謂季彥曰今朝廷以下四海之內皆爲章句內學而君獨治古義治古義則不能不非章句內學非章句內學則危身之道也獨善固不容於世今古義雖善時世所廢也而獨爲之必將有患盍固已乎答曰君之此言殆非所望也君以爲學學知乎學愚乎大夫曰學所以求知也季彥曰君頗日聞吾說古義一言輒再稱善善其使人知也以爲章句內學迂誕不通卽使人愚也今欲使吾釋善善之



知業習迂誕不通之愚學爲人謀如此於義何居且君子立論必析是非以是易非何傷之如主上聰明睿知不欲兩聞其義博覽古今擇善從之以廣其聖乎吾學不要祿貴得正義爾復以此受惠猶甘心焉先聖遺訓壁出古文臨淮傳義可謂妙矣而不在科策之例世人固莫識其奇矣斯業之所以不泯賴吾家世世獨脩之也今君猥爲祿利之故欲廢先君之道此殆非所望也若從君言是爲先君正義滅於今日將使來世達人見今文俗說因嗤笑前聖吾之力此蓋爲先人也物極則變比百年之外必當有明德君子恨不與吾偕世者於是大夫悵然曰吾意實不及此敢謝不敏

楊太尉問季彥曰吾聞臨晉君異才博聞周洽羣籍而世不歸大儒何也答曰不爲祿學故也惡直醜正實繁有徒辨經說義輒見增疾但以所據者正故衆人不能害爾免害爲幸何大儒之見歸乎

季彥見劉公客適有獻魚者公孰視魚歎曰厚哉天之於人也生五

穀以爲食育鳥獸以爲之肴衆坐僉曰誠如明公之教也季彥曰賤子愚意竊與衆君子不同以爲不如明公之教也何者萬物之生各稟天地未必爲人人徒以知得而食焉故孝經曰天地之性人爲貴貴有知也伏羲始嘗草木可食者一日而遇七十二毒然後五穀乃形非天本爲人之生也蚊蚋食人蛆蟲食土非天故爲蚊蚋生人蛆蟲生地也知此不然則五穀鳥獸之生本不爲人可以爲無疑矣公良久曰辨哉衆坐默然

永初二年季彥如京師省宗人仲淵是年夏河南四縣雨雹如椀杯大者如斗殺禽畜雉兔折樹木秋苗盡於是天子責躬省過並令幽隱有道術之士各得因變事極陳厥故季彥與仲淵說道其意狀曰此陰乘陽也貴臣擅權母后黨盛多致此異然乃漢家之所大忌也于時下邳長孫子逸止仲淵第聞是言也心善之因見上說焉上召季彥季彥見於德陽殿陳其事如與仲淵言也曰陛下增脩聖德慮



此二者而已矣夫物之相感各以類推其甚者必有山崩地震白氣相因其事不可盡論往者延平之中鄧后稱制而東垣巨屋山大崩聲動安邑卽前事之驗者帝默然左右皆不善其言季彥聞之曰吾豈容媚勢臣而欺天子乎後子逸相魯舉季彥孝廉固辭不就會遭兄長彥憂遂止乎家季彥爲人謙退愛厚簡而不華終不以榮利變其恬然之志見不義而富貴者視之如僕隸其下筆則典誥成章吐言必正名務理故每所交游莫不推先以爲楷則也年四十有九延光三年十一月丁丑卒

孔叢子卷第七





孔叢子釋文

嘉言第一

萇

長音

安施

商移切

或弛

詩止切

好禮

虛到切

事夫

風無切

使于

疏吏切

遇虺

許偉切

後瘳

丑鳩切

與在

預音

爲病

于僞切

夫三折

上音

已之

扶下切

已之人

已並

養里切

同既宴

伊甸切

夫死

扶音

與計

預音

盍姑

已下

音已

夫以

音扶

繫方

胡計

吉詰切

絕下同

填之

堂練切

已矣

以音

富說

輪藪切

知者

音智

夫不

音扶

論書第二

曠夫

風無切

已歿

以音

己之

紀音

彤日

以中切

之惡

鳥各切

論事

盧困切

錯行

七各切

樂之

音落

愀然

七小切

而已

已音

惡覩

鳥音

大麓

鹿音

已而

以音

迷錯

七各切

切奴且

與於

預音

祗祗

旨夷切

刑錯

七故切

三監

古咸切

所任

汝燒切

應之

去聲

之長

切展兩

記義第三

鍾餽

許記切

施人

施智切

相室

息亮切

從死

才用切

長者

展兩切

好人

虛到切

譽己

孔

叢

子

釋文

中華書局聚

紀音任汝鳩切臣自任同已耳音已並音使宰切宰爽士舍實音私昵切昵足質切造周早

陷辟切彼亦淇澳切乙六苞苴切子余好賢切呼告同下函公切亦作邠切造周早

切與於預音蓼莪切力竹裳裳字如清澈切勅列為施切商移

刑論第四

刑省所景切降典古巷切折民之列切弗勝詩證切又書無別切彼列刑重

直隴民匱切求位惡之切烏故不省切所景夫赤切扶音折獄切之烈非從切牆容則

已音適再施雙切不中切陟仲比罰切卑履斷者切徒玩之悖切蒲沒之扱切諸氏亦

作惡其下為故切閑居閑音

記問第五

孔伋級音析薪切先的負荷切下可任賢切汝鸞亟聞切訖力任法切汝鸞之知音

難諸那千切寶孽蚩周切息鄴側切鵠切操曰切七到已得切音焉師切於梟鳴切

上堅堯切慘焉尤虔切所好虛到切只且下切諸氏使以切爽士剡施切上力紙切爾切

自嬰伊盈切蔓延夷然切亦去聲永歎切他干涕竇切羽敏使使切下爽士切車子切



斤於切又昌遮切 鉏商狀魚 五父方矩 麝身居筠切又作麝麋同 今見賢遍 應之於證

雜訓第六

由砥諸氏切 不與預音 相好虛到 舍玦古上音捨下 珠瑱他甸切 子車斤於切 於

鄉徒甘切 而別皮列切 使以疏吏切 當免同亡運切 疏遠音殊 爲屬殊玉切 令

名力正切 之惡烏各切 以振賑音 受禪時戰切 舍適音上的下

居衛第七

可將卽亮切 百乘繩證切 君任汝鳩切 不訾卽移切 適齊施雙切 相易夷益切 寄

帑與孛同 有奇居宜切 折臂食列切 秃骭下晏切 背僂隴主切 不與預音 大牢音泰 不

累力僞切 惡有烏音切 其行下孟切 自契私列切 亦高切 同譬枯切 追王于况切 大王音泰 賈父

不爲于僞切 適宋施雙切 樂朔嶽音切 焉得於虔切 珪瓚才贊切 桓鬯丑亮切 下賈父

巡守第八

巡守音狩 禪泰時戰切 日墀時戰切 齊車側僭切 舍奠上音釋 納賈音價 好惡上虛切

孔叢 子釋文 一中華書局聚

到切下  
鳥故切  
壑辟音  
日齊側  
借切

公儀第九

參三音  
要利切  
伊消切  
其行下  
孟過行  
孟胡毋  
無甚易  
以鼓切

抗志第十

鰥魚姑頑切  
一魴音房  
使乎疏吏切  
和者胡臥切  
以長丁丈切  
無已音以  
故使

爽士  
舍所捨音  
必疣尤音  
期大居之切  
爲人于僞切  
府藏才浪切  
之分扶問切  
無伯許

如字又  
音霸  
汨之古忽切  
不禁居吟切  
適觸施隻切  
自累力僞切  
四乘繩證切  
餽焉許

祭膳符表切  
已優音以  
行志戶庚切  
食已下音  
重違直隴切  
已言音  
談說

式銳  
屬耳之欲切  
喪也四浪切  
卒盡卽律切

小爾雅第十一

莽艾牛蓋切  
頌賦逋還切  
樸博木切  
模臬倪結切  
徹勅列切  
造之七到切  
燿剗將廉切

廣言



害何

曷葛切

麗

直略切

脩杼

直呂切

化辨

四彼切

印我

俄剛切

籲和

俞戊切

汨猾

古忽切

切焮也

香斬切

焮乾

欣衣切

晞慘

桑感切

勦截

楚夜切

辟除

北激切

恭

渠記切

燁之

稱延切

嘗慙

莫中切

惶往

巨二切

胡光切

狂伏

上女切

殿填

顛甸切

下音鎮切

廣訓

惡乎

音烏

鞞鞞

羽鬼切

魴鱖

上符方切

麀鹿

於丘切

麇麇

虞矩切

曰噓

莫江切

廣義

曰煖

渠營切

曰嫫

陵之切

屬婦

時欲切

非分

扶問切

曰難

乃版切

曰恧

女六切

廣名

之阼

余廉切

從先

牆容切

之賄

撫鳳切

之祿

徐醉切

之疎

羊至切

之竈

昌緇切

又充芮切

廣服

織繒

慈陵切

曰縞

古老切

紱謂

分物切

襜褕

上蚩占切

紕之

直質切

之裨

蚩廉切

冪

莫狄切

牀第

壯士切

鍵謂

巨偃切

廣器

孔

叢

子

釋文

三一中華書局聚

之鵠

古毒切

之正

諸城切

之槩

倪結切

之斂

鎗切

于嚴

房越切

之斂

又切

之斂

侯切

之鞞

上下布頂切

之斂

璧吉切

之斂

他切

之艇

待鼎切

之斂

薄故切

之斂

古上切

力公切

之斂

訖岳切

之斂

環切

之斂

以律切

之斂

他刀切

之斂

側莖切

之斂

章忍切

頻彌切

廣物

之秆

古旱切

之粒

力入切

之粒

陟栗切

曰堰

烏轄切

曰筥

居許切

曰稷

於求切

之葦

食荏切

又

之椽

徐兩切

廣鳥

白脰

田侯切

鸞

羊茹切

廣獸

之犴

古賢切

之縱

子紅切

之斂

桑威切

魚舍

如字

之度

丘弭切

之兩

力讓切

之量

之盛

時征切

之盜

戈質切

之衡

之銖

慵朱切

之鏘

龍輟切

之緩

胡關切

公孫龍第十二

珍儀宋版印



盍往

轄臘切

悖

蒲沒切

之令

力政切

兇

徐姉切

而喪

四浪切

其行

下孟切

狹之

狎音

泥論

泛音

幾能

機音

惡得

烏音

儒服第十三

筭

色洽切

而已

已音以下

與焉

預音

獲已

已音

比力

卑履切

訾

紫音

所喪

四浪切

對魏王第十四

與謀

預音

則射

神夜切

相揉

忍九切

相錯

倉落切

所喪

四浪切

惡之

烏故切

訥訥

懦物切

陳士義第十五

使者

疏吏切

蔬食

嗣音

一夫

膚音

降節

字如

夫豈

扶音

欲強

巨兩切

必當

丁浪切

上公渾切

下五乎切

皜然

胡老切

少寡

下燒照切

相好

虛到切

折毀

旗列切

五父

甫音

合葬

閣音

大行

下孟切

橫生

戶孟切

由惡

烏故切

使相

爽士切

脩好

虛到切

而燕

宴音

強之

如字

不已

以音

麤於

曼悲切

貲擬

資音

疏達

疎音

之行

下孟切

詔魁

寐音

度骸

唐各切

膚

赤證切

論

盧困切

宮他

唐何切

作難

乃旦切

相惡

烏各切

而臨

力鳩切

舍先

音相魏悉亮切喪職四浪切麤裘曼悲切而蒂博蓋切幾乎音機

論勢第十六

求從將容切數被色角切二難乃且切自累力總切質秦音致嫪毒上郎到切在

喪字如

執節第十七

義強巨兩切談說舒贅切省刑所省切問相悉亮切其行下孟切卒不

遵律強作同學行下孟切

詰墨第十八

崇喪蘇郎切惡禮烏故切苴經子余切菅菲古顏切躬行戶庚切陰重直隴切強諫

其良卒自遵律切

獨治第十九

易操倉躁切名鮒方馮切塞於桑則切媾音遺降殺上如字之免音問弗父音甫

問軍禮第二十



齊戒側皆切下齊三日齊同舍奠音釋訊馘古獲切飲至於禁切絜齊側皆切

答問第二十一

之知音智戾夫風無切當之如字度其唐落切下施施余支切何施商移切三恪

康落第壯士切累累力追切使使上爽切霈然普蓋切跌而田烈切無累力追切

决拾古穴切梟將堅堯切扛鼎古雙切躩獸初衙切吶吶許拱切贛忿亦陟切

舍旃音捨令圖力政切

連叢子上第二十二

相魏湘亮切將事卸亮切蓼侯力竹切轉相思繫切繫說端熱切使永爽士切方帥

音駢田音猖狂上勅朱切乃夸音誇駢日於計切苑令力政切怔忡上朱切

容喪精四浪切登較古孝切孟賁遺昆切蹂狎柔首切至樂下各切猗那上朱切

下奴飲燕音宴洗解支義切兕觥序娣切鴉于堯切喪已四浪切令考力政切蓼蟲

何切奴切蠕蟲而充切焉立於虔切惡能烏音切將焉於虔切衍衍空旱切山醫力舊切雅

好虛到切褻事先烈切性分扶問切亢疏上音抗知足音智謂強如字剛愎壁懣切

孔叢子釋文 五五中華書局聚

稱此赤證析理星歷下河交折其章烈揆度唐落斷

氣徒管切

連叢子下第二十三

行非下孟令史力政得與音預受釐虛其惡有音為盍辭轄臘為人

于僞請從才用燕見音宴造其倉到可度唐落行高下孟別而彼列交

燕音宴締素杜奚以好虛到又數色角賑之止忍為贏餘輕取後娶音與

殺音預荷已音以有分扶問惡乎音為幾於音機已乎音以學知音同何居音基要

祿音腰悵然丑亮惡直音為知得音同省宗音息捲杯音同乘陽音神

孔叢子釋文



孔叢子記先聖之遺訓與世家有足稽者近世鮮所流傳今夏官貳卿林公填江右時取其書刊之以惠學者既而召去余適繼至得書以此爲託且曰校讎之未精也因取而閱之譌至多遂訪得蜀書意其據而脫繆乃滋甚幸有可以互見者又旁證遠取凡刊誤幾六百字今可讀矣然前輩謂校書如几塵隨去隨有故歐陽公讀韓文得石刻益知讎正之難因書其末以諭後之君子淳熙戊申七月濡須王藺書

101418165

珍做宋版印

天子御書

對香除益益世物也

百字各下

或其所而御賜

及後

贈送

中華民國貳年陸月拾日

贈送







國家圖書館



002512022



籍